

關中勝蹟圖志

漢中府
疆域圖

東北交蓋縣三界六百十里

北交寶雞縣
界五百十里



東交石泉縣界三百十里

東南交紫陽縣
界三百二十里

國宗閣


南交江南縣界十四里

關中勝蹟圖

漢中府

關中叢書

西北交兩雷線
界四百八十里



里十四百三界縣九廣交南西

疆域

秦

棧


圖


煎茶坪
東河橋



關中勝蹟圖

漢中府







關中勝蹟圖

漢中府







中書錄

此泉相山圖

泉字


山中紫柏山

後紫柏山

紫柏山



前紫柏山



張良辟穀處

紫柏山

正車山圖

關中勝蹟圖

漢中府

九

關中叢書

定軍山




萬壽塔

河



漢江

武侯祠



定軍山

全
中
陝
圖

金牛峽




關中勝蹟圖

漢中府




十二關中叢書

金牛峽




漢中府
漢中府
圖

漢中渠



漢





烏龍江


蕭公祠

蕭何堰

縣城

府中

漢江



關中勝蹟圖志卷十九

兵部侍郎兼都察院右副都御史陝西巡撫畢沅纂

地理

漢中府釋名漢書地理志秦郡華陽國志秦惠文王二年

置郡因水名也謹案以為惠文王二年置與史記異府志郡臨漢水之陽南

面漢山故名沿革一統志治在省城西南一千七十里禹

貢梁州之域謹案通考舜置十二州梁州其一也西方金剛其氣強梁故名春秋時為蜀

地戰國初秦楚之境後屬秦置漢中郡謹案史記秦惠文王十三年攻楚漢

中取地六百餘里置漢中郡漢初為漢國後仍為漢中郡屬益州謹案武帝

元朔二年改後漢因之三國屬蜀謹案通典後漢末張魯據其地改漢中為漢寧

魏武復魏景元四年克蜀兼置梁州謹案袁宏後漢紀云

曰漢中魏置梁州十八年省以其郡國併屬冀州王隱晉書

魏末克蜀分廣漢巴涪陵北七郡為梁州治沔陽謹案晉書地理志泰始

之三年立梁州于南鄭東晉隆安中又僑置秦州宋齊

因之梁天監三年入於魏曰梁州漢中郡大同初還梁西

魏廢帝元年復克之隋開皇三年郡廢大業三年州廢改

為漢川郡唐武德初復曰梁州置總管府開元十三年改

曰褒州謹案唐志云以梁涼聲相近更名二十年復故天寶初曰漢中郡

乾元初復曰梁州興元元年升興元府為山南西道節度

使治謹案唐志太宗元年分山南道開元二十一年五代

屬蜀謹案唐書李茂貞傳茂貞被梁圍興元遂入于蜀通考云孟蜀改興元府為天義軍後復故宋曰

興元府漢中郡山南西道節度爲利州路治紹興十四年
分爲利州路治元爲興元路屬陝西行省明洪武三年改
爲漢中府九年屬陝西布政使司本朝因之領縣八曰南
鄭褒城城固洋西鄉鳳沔略陽州一曰寧羌廳一曰留壩
形勝華陽國志東接南郡南接廣漢西接隴西陰平北接
秦州唐六典東接荆楚西抵隴蜀南控大江北據商華之
南歐陽詹集秦之坤蜀之艮連高夾流九州之險唐文宗
命溫造爲山南西道節度使詔漢水上游梁山東險控巴
岷之道路作咸鎬之藩屏太平寰宇記氏羌接軫爲威御
之鎮孫道夫奏議前瞰三秦後蔽四川黃橫以爲蜀之股

肱楊洪以爲蜀之咽喉府城太平寰宇記大業八年築城
南臨漢水通志舊址在府東二里秦厲公所築漢高祖王
漢中時居此宋嘉定十二年徙築今城明正德五年修築
悉甃以磚周九里有奇天啓元年因建瑞藩展北二丈十
步門四東曰朝陽西曰振武南曰望江北曰拱宸

南鄭縣釋名水經注縣故褒之附庸也耆舊傳云南鄭之
號始于鄭桓公其民南奔故以南鄭爲稱漢中郡治也沿

革一統志附郭本秦南鄭邑漢置縣爲漢中郡治後漢至

南北朝因之隋爲漢川郡治唐爲興元府治宋因之

謹案
宋紹

興四年曾析置廉
水縣紹定中廢元爲興元路治明爲漢中府治本朝因

之

褒城縣釋名顏師古漢書注即梁州之褒縣也舊曰褒中

通志隋改褒城沿革一統志治在府西北四十里漢置褒

中縣謹案漢以漢陽鄉置華陽屬漢中郡為都尉治後漢

因之晉義熙改曰苞中謹案宋書州郡志義熙中譙縱之亂漢中移治魏興縱滅還治漢中

之苞中縣所謂南城也又路史盟會圖梁州褒城縣漢之褒中義熙改曰苞中晉志仍作褒中似非劉宋省

後魏永平四年復置褒中縣兼置褒中郡隋開皇初郡廢

改縣曰褒內仁壽元年又改褒城謹案隋志仁壽九年以失印更給改名元和志

作元年一統屬漢川郡義寧二年又改褒中唐貞觀三年

復曰褒城屬興元府宋因之元屬興元路明屬漢中府本

朝因之形勝史記棧道千里惟褒斜綰轂其口岑參集爲
蜀西蔽在周南岐府志東環褒水西峙牛山中梁聳其南
雲棧繞其北縣城九域志宋嘉祐中徙治于山河堰通志
漢唐建縣于打鐘壩宋徙山河堰北紹興中兵燬明正德
四年蜀有藍鄙之亂巡撫藍璋以褒據秦蜀之衝下令修
築甃城以石至三里門四

城固縣釋名缺沿革缺形勝郭愷開石峽記介梁洋之間

南控巴山北距漢水通志前瞰巴山後據秦嶺漢江清水
合流雙乳五峯並峙縣城水經注城或言韓信始立或言
張良始築通志蜀漢建興七年諸葛亮建樂城魏正始中

移治壻鄉宋崇寧二年移建今城明正德七年拓築甃甃

周七里有奇門四

洋縣釋名太平寰宇記後魏置洋州因水為名謹案水經注載漢中

記曰洋川者漢戚夫人之所生處也高祖得而寵之夫人思慕本鄉追求洋川米帝乃驛致長安蠲復其鄉更名曰縣攷漢志無洋川縣漢中記不知何所本並附志于此沿革一統志治在府東一百

二十里漢城固縣地晉置興道縣屬漢中郡劉宋廢後魏

延昌三年置興勢縣屬晉昌郡謹案寰宇記正始中唐興勢縣復自石泉移晉昌郡

于此因晉舊名也縣以山得名西魏分置儻成郡謹案寰宇記廢帝二年改晉昌郡為儻成郡

隋開皇初郡廢以縣屬漢川郡唐初屬洋州貞觀二十三

年改曰興道天寶十五載移洋川郡來治乾元初復改郡

曰洋州屬山南西道五代時孟蜀改曰源州謹案寰宇記蜀避知祥諱

改曰源州宋初復曰洋州元至元二年以州治興道縣省入屬

興元路明初降州為縣屬漢中府本朝因之形勝方輿勝

覽要地有三置關有八府志龍首峙于北灊水匯於西縣

城通志宋熙寧間文同守洋州築土為城明崇禎七年整

以甃周七里有奇門五唐和凝洋川詩華夷圖上見洋川知在青山綠水邊官閑最好遊僧

舍江近應須買釣船鄭谷送祠部曹郎中鄴出守洋州詩為儒欣出守上路亦戎裝舊製詩多諷分憂俗必康開懷

江稻熟寄信露橙香郡閣清吟夜寒星識望郎宋蔡交洋州詩武定新雄閩豐寧舊奧墟地兼秦蜀美川會漢洋紆

翠壘環封嶺清流躍冶渠安知下斜谷別得上華胥乾酒香村落生金富里閨晴軒迎蝶竦夜管送蟾蜍啼鳥絃幽

塢芳花綉碧墟路飛游女蓋巷曳隱人裾陸會尋穿石江邀揭聚魚繳將藤解圻耗用穀驅除雙竹溪翁杖柔芎壩

戶蔬鎮留仙子限巖邃佛人居照市成都錦盈庠闕里書
採茶驚雉鷓護橘趁狝狙俗洽庭無訟年豐膾有儲大資
州將懶藐與世賢疎統總村向有甘酣分已餘正宜心自
作更欲位誰如未執歸田耒猶乘集事車好於閑靜處積
漸學
樵漁

西鄉縣釋名府志與夔之東鄉對故名沿革一統志治在

府東南二百四十里漢城固縣地蜀漢置南鄉縣晉改曰

西鄉謹案宋書州郡志以屬漢中郡宋齊因之後魏改置

豐寧縣謹案元和志正始中廢西鄉縣于豐寧戍置縣焉兼置洋州及洋川郡隋

開皇中郡廢大業初州廢縣復曰西鄉屬漢川郡唐武德

初復於縣置洋州天寶初曰洋川郡十五載徙郡治興道

以西鄉屬焉謹案唐初曾析置洋源縣寶歷元年省宋亦屬洋州元屬興元

路謹案續通考西鄉宋端平中廢明復置明屬漢中府本朝因之形勝張台

曜重修城垣記三楚上游關南候邑通志南接蜀川北連

秦嶺江漢遶其東巴山峙其西縣城通志宋建於蒿坪山

之陽元遷今治建城甄土相半明正德中築東關新城嘉

靖初悉整以甄周三里門四宋文同過西鄉詩西鄉巴嶺下鳥道入孱顏使騎到荒驛

野禽啼亂山問民青靄裏訪古白雲間幾日南來路新詩滿軸還

鳳縣釋名通典鳳州春秋氏羌之所居方輿勝覽鸞鷲嘗

鳴於岐翱翔至南而集焉是以西岐曰鳳翔南岐曰鳳州

沿革一統志治在府西北三百八十里漢置故道縣屬武

都郡後漢及晉因之謹案縣于永嘉後沒氏羌後魏太和元年改置涼

泉縣尋改曰梁泉

謹案元和志取縣西梁泉為名屬固道郡以故為固蓋變文

孝昌中

又置南岐州西魏廢帝年改州為河池郡唐武德初復為

鳳州天寶初曰河池郡乾元初仍曰鳳州屬山南西道

謹案

唐初曾析置黃花縣寶曆元年省

五代屬岐後屬蜀

謹案五代史職方考鳳州岐蜀唐晉漢周

俱有宋仍曰鳳州河池郡屬秦鳳路元至元五年以州治梁

泉縣省入屬興元路明初降州為縣屬漢中府本朝因之

形勝太平寰宇記北接藩戎東綿秦漢縣志大散扼其東

武休障其西褒斜阻其南秦嶺限其北重巖疊嶂隱然為

蜀門重地縣城通志古鳳州舊治明嘉靖十九年悉毀以

石周四里有奇門三

宋汪元鳳州歌鳳州南去是南岐大散橫盤勢更危躍馬紫金河畔路萬

枝楊柳撒金絲明薛瑄過鳳縣詩莫道西行蜀道難老來
深喜縱遐觀山從太白連岷嶺水號嘉陵出散關石積層
崖知地厚路登絕巘覺天寬驅兵
過此思諸葛大節常留宇宙間

沔縣釋名通志本漢沔陽以沔水為名也元至元中移沔
州來治明降為縣沿革一統志治在府西一百十里漢置

沔陽縣屬漢中郡後漢晉及宋齊因之後魏析置蟠冢縣
並屬華陽郡謹案郡國記以為正始中置隋初省沔陽縣

大業初改蟠冢曰西縣謹案郡國志以縣屬漢川郡唐武
德三年于縣置褒州八年州廢縣屬梁州謹案唐志武德

州曾析利州之綿谷置謹案宋乾德三年以縣直隸京師謹案

金牛縣寶曆元年省謹案事直屬朝廷二縣遂割出隸京師三泉今寧羌州謹案後屬

興元府元初屬沔州至元二十年省西縣入略陽改置鐸

水縣移沔州來治後又省鐸水縣入州

謹案元一統志鐸水縣本西縣舊鎮

也戊午年以其地升為褒州改鎮為縣至元二十年廢褒州移沔州來治省縣入州

明初改州為縣

屬漢中府成化二十二年改屬寧羌州

謹案明會典舊隸寧羌州嘉靖八年

改本朝仍屬漢中府形勝張浚奏議漢沔形勝之地前控

六師之路後據西蜀之要左通荆襄之財右出秦隴之馬

縣城水經注城蕭何所築南臨漢水北帶通達華陽國志

城舊傳蕭何所築劉備為先主權住此城通鑑地理通釋

蜀令蔣濟築漢城通志明洪武四年遷於西山谷口沔水

環流萬曆元年瑩以甃周三里門四

略陽縣釋名通志用武之地曰略衆山之南曰陽故以為

名沿革一統志治在府西北二百九十里漢置沮縣屬武

都郡後漢及晉因之謹案元和志漢本沮縣地永嘉末為氏人所據郡縣荒廢後魏正

始三年置武興鎮尋改置東益州及武興郡謹案胡三省通鑑注武興

漢武都之沮縣也宋立東益州以為宋者誤雍勝略云楊茂搜分王武興後魏為武興縣又僑立略陽郡略陽縣漢

之略陽在今鞏昌界故僑置於此又後魏析置落叢郡明水縣長舉縣皆于此地西魏廢帝二年

改州曰興州郡曰順政謹案以漢曲靈道二縣附焉略陽地也漢曲隋開皇二年廢靈道大

業初廢並併入順政大業二年罷州為順政郡唐武德復為興州天

寶初復曰順政郡乾元初仍曰興州屬山南西道五代屬

蜀宋仍曰興州順政郡屬利州路開禧三年改州曰沔州

縣曰略陽嘉定三年仍屬利州路元至元十四年改屬廣
元路二十年移沔州治鐸水縣以略陽縣屬焉明初屬漢
中府成化二十二年屬寧羌州本朝仍屬漢中府形勝柳
宗元興州江運記崖谷峻絕十里百折府志山峯環轟江
濤洶湧道路險惡控扼蜀門縣城通志卽古興州城址明
正德六年築土城周五里門五

寧羌州釋名通志本白馬氏東境成化中設寧羌取輯寧
氏羌之意沿革一統志治在府西南二百有八十里漢廣

漢郡葭萌縣地

謹案應劭音家萌

晉梓潼郡晉壽縣地隋爲義成

郡綿谷縣地唐武德四年分置三泉縣兼置南安州

謹案分綿

谷縣置

八年州廢縣屬利州天寶元年改屬漢中郡宋乾德三年以縣直隸京師至道二年建爲大安軍三年軍廢縣仍屬京師紹興三年復置大安軍屬利州路元初爲大安州至元二十年降州爲縣屬沔州又省三泉縣入之明初省大安入沔縣改置寧羌衛成化二十二年升爲寧羌州屬漢中府本朝因之形勝元一統志劍閣朝天峙其西五丁嶓冢據其北南控川蜀東連漢沔府志控扼蜀門山有嶓冢河有漾水州城通志設自白馬氏之羊鹿坪明洪武三十年因氏民田九成據馬面山作亂遣指揮姜觀建寧羌衛于此成化二十二年建州於衛治南漢水繞城地勢

險固周七百七十餘丈門四

留壩廳釋名府志治在紫柏山相傳留侯辟穀之所故名

明初置巡司于此

謹案明何景明武關詩作劉壩

沿革府志本鳳縣地縣

舊設草涼梁州三岔松林留壩武關六驛乾隆十五年移駐漢中府通判分管松林留壩武關三驛二十九年將三驛地方事務分隸管轄三十九年改設同知爲留壩廳形勝府志南出褒斜秦楚要膺城垣府志本巡司舊堡明築

關中勝蹟圖志卷十九終

關中勝蹟圖志卷二十

兵部侍郎兼都察院右副都御史陝西巡撫畢沅纂

名山

漢中府旱山在南鄭縣西南二十里詩大雅瞻彼旱麓毛
傳旱山名漢書地理志南鄭縣有旱山水經注池水出旱
山周地圖記山上有雲卽雨旁有石牛十二頭下有石池
水雍大記漢山在縣西南三十里四峯八面東臨老渚河
北據漢水南接巴山有池水一統志亦名天池山謹案旱
漢以音
近而訛後人遂分以爲二山也漢志池水
出旱山而雍大記漢山有池水益爲可據

梁山在南鄭縣東南百八十里太平寰宇記爾雅云南方

之美者有梁州之犀象焉州因山名胡三省通鑑注梁山

大山四圍其中三十里許甚平曠或云古梁州治也輿地

紀勝其西與孤雲兩角諸山相接縣志亦曰梁山謹案胡三

省說與輿地紀勝中梁山之說同

玉女山在南鄭縣南百九十里唐書地理志南鄭縣有玉

女山太平寰宇記上有古城三門不可登山下時聞鐘磬

之聲道經云玉女所居之地故名輿地紀勝一名米倉山

與大巴山相連謹案大巴山即下嶺巴山有韓信廟及截賢嶺云蕭何

追韓信至此縣志米倉山高聳摩雲登其巔則褒沔洋鳳

俱歸一覽人稱之爲仙臺山

龍岡山在南鄭縣西十里隋書地理志南鄭縣有龍岡山
華陽國志龍岡山北臨漢水南帶廉津輿地紀勝相傳梁
天監中有龍鬪於此故名

黃牛山在南鄭縣西南五十里魏書地形志華陽縣有黃

牛山隋書地理志南鄭縣有黃牛山謹案華陽後魏有沔縣也蓋山界兩山之

間志家皆入于南鄭縣今從之太平寰宇記山有石黃色遠望如牛因名

山下有黃牛川十道記云黃牛川有再熟之稻土人重之

中梁山在南鄭西十五里唐書地理志南鄭縣有中梁山

輿地紀勝漢中紀云以其鎮梁州之中故名雍勝略山脈

西自沔縣定軍山來明一統志在南鄭褒城之界宋徐積中梁山

寺詩上方梯磴繞巖頭誰就孤高更起樓直望漢江三百里一條如練下洋州

寶山在南鄭縣北十餘里輿地紀勝舊傳山中得寶珠故名

巴嶺山在南鄭縣南百九十里接西鄉界水經注廉水出巴嶺山周地圖記此嶺之南古之巴國元和郡縣志東濱漢江與三峽相接山南卽古巴嶺輿地紀勝亦名孤雲山在廉水縣東南百七十里相近者曰兩角山

聽山在南鄭縣西北二十七里水經注壻水北發聽山輿地紀勝西抵壻水小溪通志俗傳唐公房仙去壻歸惟聞空中歌管聲因名聽山

師子山在南鄭縣北四十里雍勝略形如師子上有寶峯
院下有洗佛潭通志潭在師子山西南水自懸崖下注其
潭有三地險水深

籠蓋山在南鄭縣西南五十里雍勝略其南麓與巴山相
接老渚河源出于此

峨公山在南鄭縣南六十里通志宋元嘉十一年蕭承之
進據峨公山擊敗楊難當軍梁士民思承之功于峨公山
立廟祀之

駱谷在南鄭縣東北百二十里水經注洛谷水出洛谷谷
北通長安謹案洛與駱同雍勝略駱谷在南鄭縣北通盩厔駱谷

關通志自洋之真符至此屈曲八十里八十四盤姜維伐

魏出此

宋韓琮駱谷詩秦川如畫柳如絲去國還家一望時公子皇孫莫來好嶺花多是斷腸枝

武鄉谷在南鄭縣東北三十里十道志卽諸葛亮受封之

地

以上南鄭

石門山在褒城縣北十里左思蜀都賦岨以石門水經注褒水東南逕大石門歷故棧道下谷又東南歷小石門門穿山通道六丈有餘刻石言漢明帝永平中司隸校尉犍爲楊厥之所開逮桓帝建和二年漢中太守同郡王升琢石頌德輿地記石門在褒中之北漢中之西是爲全蜀之險縣志石門在北鷄頭關下此門通可避七盤之險

漢王升石

門頌惟坤靈定位川澤股躬澤有所注川有所通斜谷之
川其澤南隆八方所達益域爲充高祖受命興于漢中道
由子午出散入秦建定帝位以漢詆焉後以子午塗路滋
難更隨圍谷復通堂光凡此四道垓鬲尤艱至于永平其
有四年詔書開斜鑿通石門中遭元二西夷虐殘橋梁斷
絕子午復循上則懸峻屈曲流巔下則入窰窟寫輪淵平
阿涼泥常蔭鮮晏木石相距利磨礮磐臨危槍礪履尾心
寒空輿輕騎滯礙弗前惡蟲齧狩蛇蛭毒蠹末秋截霜稼
苗夭殘終年不登匱餒之患卑者楚惡尊者弗安愁苦之
難焉可具言于是明智故司隸校尉犍爲武陽楊君厥字
孟文深執忠伉數上奏請有司議駁君遂執爭百僚咸從
帝用是聽廢子由斯得其度經功飭爾要敞而晏平清涼
調和烝烝艾寧建和二年仲冬上旬漢中太守犍爲武陽
王升字稚紀涉歷山道推序本原嘉君明智美其仁賢勒
石頌德以明厥勳其辭曰君德明明炳煥彌光刺過拾遺
厲清人荒奉魁承杓綏億衙疆春官聖恩秋貶若霜無偏
蕩蕩真雅以方寧靜烝庶政與乾通輔主匡君修禮有常
咸曉地理知世紀綱言必忠義匪石厥章恢宏大節讜而
益明揆往卓今謀合朝情醴艱卽安有勳有榮禹鑿龍門
君其繼蹤上順斗極下答坤皇自南自北四海攸通君子

安樂庶士悅雍商人咸喜農夫永同春秋記異今而紀功
垂流億載世世歎誦序曰明哉仁知豫識難易原度天道
安危所歸勤勤竭誠榮名休麗魏王遠石門銘並序此門
蓋漢永平中所穿經數百載世代綿邈戎夷遞作乍開乍
閉通塞不恆自晉氏南遷斯路廢矣其崖岸崩淪澗閣湮
圯南北各數十里車馬不通者久之攀蘿捫葛然後可至
皇魏正始元年漢中獻地褒斜始開至于門北一里西上
鑿山爲道峭岨盤紆九折無以復加徑途窒礙行者苦之
梁秦初附實仗才賢朝難其人哀簡良牧三年詔假節龍
驤將軍梁秦二州刺史泰山羊公建旛嚙豕撫境綏遐蓋
有叔子之風焉以天險難升轉輸艱阻表求自迴萬以東
開創道路釋負擔之勞就方軌之逸詔遣左校令賈三德
領徒一萬人將帥百人共成其事三德巧思機發情解意
會雖元凱之梁河德衡之損躡未足以偶其奇謀起自四
年十一月十日訖永平二年正月畢工閣廣四丈路廣六
丈皆填溪棧壑斫險梁危自迴萬至谷口二百餘里連輶
駢轡而進往哲所不工前賢所輟思莫不夷通焉王生履
之可無臨深之歎葛氏若存幸息木牛之勞于是畜產爐
鐵之利紈綿罽毼之饒充初川內四民富貴百姓息肩壯
矣自非思埒班爾籌等張蔡忠公忘私何能成其事哉乃

作銘曰龍門斯鑿大禹所彰茲巖乃穴肇自漢皇道由國中
以宣四方其功伊何既逸且康去深去阻匪閣匪梁西
帶濟隴東控樊襄河山雖險漢德是強昔為畿甸今則關
疆永懷古烈蹟在人人亡不逢殊績何用再光水眺收晶林
望幽長夕凝晚露晝涵曙霜秋風夏起寒鳥春傷穹窿高
閣有車麟麟成夷古道駟牡其駟千載絕軌百兩更新敢
刊巖曲以紀鴻塵謹案此二頌銘皆磨崖刻於石門中
者今見在孟文頌隸書建和二年立王遠銘正書永平二
年立此外又有漢鄒君開道碑永平六年立魏李苞題名
景元四年立並分書又有楊淮碑楊弼及淮卽孟文之曾
也孫

衙領山在褒城縣西北九十八里漢書地理志武功縣褒

斜二水俱出衙領山水經注褒水西北出衙領山謹案縣北九十

里有馬道山東北有鳳皇山一名太白山又縣北九十
五里有燕子崖以道里計之疑卽衙領嶺今作嶺同

七盤山在褒城縣北十里雍大記七盤山頂曰鷄頭山通

志在鷄頭關下盤迴七轉方至山頂由此入連雲棧山頂

有洞下有穴大如斗名魚洞唐沈佺期夜宿七盤嶺詩獨遊千里外高臥七盤西山月

臨窻近天河入戶低芳春平仲綠清夜子規啼浮客空留聽褒城聞曙鷄吳融登七盤嶺詩才非賈傅亦遷官五月

驅羸上七盤從此自知身計定不能迴首望長安七盤嶺上一長號將謂青天鑿鬱陶近日青天都不鑿七盤應是

未高

箕山在褒城縣北二十里輿地紀勝箕山上有池四時不

涸俗號秦王獵池山南有穴號丙穴有谷號道人谷即鄭

子真隱處左思蜀都賦嘉魚出于丙穴劉逵注有魚穴三

所常以三月取之丙地名也水經注丙穴出嘉魚常以三

月出十月入地穴口廣五六尺去平地七八尺有泉懸注

魚自穴下透入水穴口向丙故曰丙穴

孤雲山在褒城縣南百二十里與南鄭縣接界玉堂閑話
興元南有路通巴州其路深溪峭巖捫蘿摸石一上三日
達于山頂行人止宿則絙蔓繫腰縈樹而寢不然則墮深
澗其絕頂謂之孤雲兩角彼中諺云孤雲兩角去天一握
淮陰侯廟在焉

牛頭山在褒城縣西二十五里魏書地形志武鄉縣有牛
頭山唐書地理志褒城縣有牛頭山太平寰宇記山高百
仞其上雲覆如笠卽雨故亦號爲戴笠山雍勝略山有巨
石似牛頭其下有靈液泉

謹案寰宇記以爲
丙水源出于此

女郎山在褒城縣西南八十里水經注漢水南有女郎山
上有女郎冢有直路下出不生草木世人謂之女郎廟及
搗衣石言張魯女也隋書地理志褒城縣有女郎山輿地
紀勝俗呼姑子山

中梁山在褒城縣南三十五里自南鄭界來府志南麓有
玉女洞溪水自山峽下瀉懸如瀑布又數步有水湧出爲
玉女泉合溪水灌田縣志從南山入褒城縣有三道東曰
猴子嶺中曰土地埡西曰石梯口石路崎嶇迤西孤峯特
立者曰大孤山又西特立兩河口者曰小孤山

雞翁山在褒城縣北六里唐韋莊詩自注鷄公幘去褒城

縣二十里稽神錄唐温造爲興元節度使行漢中大雨平

地水尺餘不可進乃禱雞翁山神疾風驅雲即時晴霽文

宗聞其事封山神爲侯謹案寰宇記亦載其事云造文宗時人通志卽連城

山也山下臨褒水相傳爲漢王練兵處謹案通志以此山爲連城後山爲雞

翁唐韋莊雞公憤詩石狀雖如憤山形可類鷄向風疑欲

門帶雨似聞啼蔓織青籠合松長翠柏低不鳴非有意爲

怕客奔齊

雲霧山在褒城縣西北七十里通志絕頂有崖高百尺橫

數十步縣境高山此爲第一上有水痕如龍黑白各四顛

倒懸掛其東西橫截者爲橫當山乃雲霧山北界

觀山在褒城縣西北七十里一統志一名雲夢山最高處

有雲臺觀觀東一里曰飛仙崖石峯壁立高三百五十五丈崖下曰龍洞深數步下有石池水自上滴入不溢不涸又西三里有青龍洞深丈餘亦有石池又有聖水洞石井亦深丈餘

石笋山在褒城縣北百二十里通志山下有龍潭廣一畝許遊者至潭隈相戒毋聲效有之則澈底清潭頃刻渾濁見者無不駭心又相近有迴水洞褒水至此潛入崖穴東通城固縣壻水河

金華山在褒城縣南九十里通志從外望之層巒疊嶂包裹有蓮花自內視之逶邐平曠最爲幽勝相近有青銍山

山多杉檜其頂有石如銚

華山在褒城縣西南一百十里通志根盤百里許有洞高大深邃內有靈湫禱雨輒應

玉映山在褒城縣南百九十里一統志明嘉靖中始開有石竇曰麒麟洞可以禱雨

褒谷在褒城縣東北十里通志自此入連雲棧西北一百五十里入鳳縣界又二百二十里直抵郿縣之斜谷今亦謂之南谷所謂南口曰褒也史記留侯世家漢王至國良送至褒中正義褒谷在梁州褒城縣北五十里左思蜀都賦良木攢于褒谷劉逵注褒中縣南口斜谷水源在北南

流經褒中故北口曰斜南口曰褒同一谷耳長四百七十里水經注褒水自小石門又東南歷褒口卽褒谷之南口也元和郡縣志褒谷山在縣北五里郡國志中間谷道褒水所流也

黃鹿谷在褒城縣東二十里太平寰宇記谷中多鹿土人亦名黃鹿山輿地紀勝一名鹿堂谷

赤崖在褒城縣西北諸葛亮與兄瑾書頃大水暴出赤崖以南橋閣悉壞通志褒閣道所經亦曰赤岸蜀漢置赤岸庫於此以資軍儲

已上褒城

通關山在城固縣北三十里水經注壻水經通關勢南山

高百丈餘高祖北定三秦蕭何守漢中欲修北道通關中故名爲通關勢輿地紀勝山在壻水北

桃林山在城固縣西北四十里雍勝略山上有石觀音像隱然崖壁間其相近又有風高山山上有風洞又稍東有五峯山

九真山在城固縣北五十里輿地紀勝道家謂太白山六百里與三嵎山相接大峯上有九真玉井

斗山在城固縣西北二十里周地圖記斗山上下有石穴開山圖斗山凡五穴一通崑崙山一通隴山一通武當山一通青城山一通長安城雍勝略與三嵎山對峙脈自三

嶠迤邐而南迴轉東向一峯聳起有似斗杓壻水自北縈

繞東出上有昇仙觀古稱福地三嶠山在縣西北四十里

輿地紀勝高聳萬仞中多靈藥太平寰宇記周地圖記云

三嶠山上有三峯如覆鼎足唐王仁裕題斗山觀詩霞衣欲舉醉陶陶不覺全家住絳

霄拔宅只知鷄犬在上天誰信路岐遙三清遼廓拋塵夢八景雲烟事早朝為有故林蒼柏健露華涼葉鎖金飈

白雲山在城固縣東北三十里通志山東有神崖山南有

駱駝山西連牛蹄山北接龍泉山多產藥物俗傳張良辟

穀於此已上城固

興勢山在洋縣北四十三里魏書地形志龍亭縣有鎮勢

山謹案龍亭故城在縣東水經注小城固城北百二十里有興勢坂

諸葛亮出駱谷戍興勢置烽火樓處元和郡縣志洋州興

道縣後魏分置興勢縣治興勢山上謹案興道故城在今縣東興勢故城在今

北太平寰宇記在興道縣西北今郡城所枕自然隴勢形

如一盆外險而內有大谷為盤道以上數里始及四門最

為險固唐和凝興勢觀詩山名興勢鎮梁洋儼有真風福此方瘦柏握盤籠殿紫靈泉澄潔浸花香暫遊頗

愛閑人少久住翻嫌白日忙只向五千文字內願成金骨住仙鄉

太白山在洋縣東北唐書地理志真符縣有太白山真符

洞輿地紀勝山去真符縣四百五十里面隸鳳翔背屬真

符唐天寶中得玉冊於此謹案此太白之陽其山陰即郿縣詳見郿縣

寒泉山在洋縣北百二十里水經注陽都坂西連寒泉嶺

漢中記曰自西城涉黃金峭寒泉嶺陽都坂峻崿百里絕

壁萬尋既造其峯謂已踰崧岱復瞻前嶺又倍過之通志

仙人李八百居之唐公房謁八百以杖指崖間泉即湧出

清涼特甚因以名山

謹案縣東北諸山嶺皆太白山之陽麓也

龍亭山在洋縣東二十五里輿地紀勝赤坂在洋州東龍

亭山土色甚赭建興八年魏軍侵漢武侯次城固赤坂以

待之即此通鑑地理通釋赤坂為龍亭入子午谷之口

謹案

舊置龍亭縣于此山上故名

白巖山在洋縣西北六十里輿地紀勝益水沙溪中山有

白石因名

七疊山在洋縣西北六十里輿地紀勝在真符縣西北三十里疊嶂七層

石鏗山在洋縣北五十里雍勝略山最高每雨必有雲出其頂通志九十四峯高聳連雲上有石椿石箱

祈子山在洋縣南七里通志一名鳳翼山下瞰漢江東枕沙河上有聖母祠祈禱輒應故名俗訛爲鷄子山山嶺有雲卽雨旱常禱此

華陽山在洋縣北百四十里通志唐分置華陽縣在今縣北以此名也

子午谷在洋縣東百六十里顏師古漢書注今京城直南

山有谷通梁漢道者名子午谷北山是子南山是午唐書地理志黃金縣有驛卽子午道也舊道在今金州安康縣界梁將王神念以舊道緣山避水橋梁百數多有毀壞乃別開乾路更名子午道卽此路也府志子午谷有二一在洋縣東一百六十里此漢魏舊道也梁別開乾路在縣東三十里龍亭

黃金谷在洋縣北八十里水經注山有黃金峭水對黃金谷元和郡縣志黃金縣西北有百畝黃金谷其谷水陸艱險語曰山水艱阻黃金子午魏曹爽伐蜀蜀將王平拒之于黃金谷謂此山也

灑谷在洋縣北三十里元和郡縣志灑谷一名駱谷在興

道縣北三十里唐書地理志興道縣有駱谷路南口曰灑

谷北口曰駱谷輿地紀勝駱谷在真符縣屈曲八十里凡

八十四盤通志後魏之灑城郡以此名謹案灑城故城在今縣北

箕管谷在洋縣北十里府志由土門入循灑水而陟其上

內平外昂一覽山無遺賸又掘地三尺即得水產佳竹舊

有亭今廢宋蘇軾文與可畫箕管谷偃竹記竹之始生一寸之萌耳而節葉具焉自蜩腹蛇蚶以至于劍

拔十尋者生而有之也今畫者乃節節而為之葉葉而累之豈復有竹乎故畫竹者必先得成竹於胸中執筆熟視

乃見其所欲畫者急起從之振筆直遂以追其所見如兔起鶻落少縱則逝矣與可之教予如此予不能然也而心

識其所以然夫既心識其所以然而不能然者內外不一心手不相應不學之過也故凡有見于中而操之不熟者

平居自視了然而臨事忽焉喪之豈獨竹乎子由爲墨竹賦以遺與可曰庖丁解牛者也而養生者取之輪扁斲輪者也而讀書者與之今夫夫子之託于斯竹也而予以爲有道者則非耶子由未嘗畫也故得其意而已若予者豈獨得其意並得其法與可畫竹初不自貴重四方之人持縑素而請者足相躡于其門與可厭之投諸地而罵曰吾將以爲韞士大夫傳之以爲口實及與可自洋州還而余爲徐州與可以書遺余曰近語士大夫吾墨竹一派近在彭城可往求之韞材當萃于子矣書尾復寫一詩其略曰擬將一段鵝谿絹掃取寒梢萬尺長余謂與可竹長萬尺當用絹二百五十五匹知公倦于筆研願得此絹而已與可無以答則曰吾言妄矣世豈有萬尺竹哉余因而實之答其詩曰世間亦有千尋竹月落庭空影許長與可笑曰蘇子辯則辯矣然二百五十五匹吾將買田而歸老焉因以所畫篔簹谷偃竹遺余曰此竹數尺耳而有萬尺之勢篔簹谷在洋州與可嘗令余作洋州三十詠篔簹谷其一也余詩云漢川修竹賤如蓬斤斧何曾赦籜龍料得清貧饒太守渭濱千畝在胸中與可是日與其妻遊谷中燒筍晚食發函得詩失笑噴飯滿案元豐二年正月廿日與可沒于陳州是歲七月七日余在湖州曝書畫見此竹發卷而哭

失聲昔曹孟德祭橋公文有車過腹痛之語而余亦載與可疇昔之戲言者以見與可與余親厚無間如此也

清水谷在洋縣東北三十里唐書地理志天寶八載真符

縣開清水谷縣志一名青谷

三嶺在洋縣東北二百餘里通志蜀漢費禕拒曹爽處上已

洋縣

巴嶺山在西鄉縣西南接四川巴州界輿地紀勝巴嶺山

在舊洋源縣南十里

謹案洋源故城在縣南

雲亭山在西鄉縣南八里唐書地理志西鄉縣有雲亭山

輿地紀勝圖經云山連巴嶺五百里崖谷險峻因山興雲

其狀如亭故名

白廟山在西鄉縣南四百里太平寰宇記西鄉縣有白廟山山上有老子廟

星子山在西鄉縣南三百里通志洋水源出于此

午子山在西鄉縣東南二十里一統志一名母子山三峯削立二水環流山巔有洞四五深不可測風出入有聲謂之風洞亦謂之午子洞又聖水峽在山之東峽中有泉自穴湧出一日三潮謂龍泉又飛龍山在山之左冠朱山在山之右

鳳凰山在西鄉縣南十五里通志又相近有皂軍山宋吳玠屯兵于此上有擂鼓臺又有龍洞元陽洞皆禱雨之所

饒風嶺在西鄉縣東北一百五十里一統志在漢江北岸
與石泉接界

穿石崖在西鄉縣南七十里通志絕壁千仞上有水簾宋
進士雷忠避兵處削成一壁高不可攀穴容千人白雲時
聚時散故穴不常見

秦王洞在西鄉縣東四十里輿地紀勝地名秦里巖洞後
多產牡丹已上西鄉

遯蹟山在鳳縣北一里方輿勝覽唐冲妙先生張果之別
隱淳熙中憲使李大正大書遯蹟山三字鐫于山麓雍勝
略一名龍腦山雍大記一名虎腦山通志今俗呼為豆積

山謹案遜豆聲之轉蹟積字之譌

南岐山在鳳縣南十里雍勝略上有竹雲洞內有湫池旱禱多應方輿勝覽鳳之名縣其疆理與鳳翔府相鄰是以西岐曰鳳翔府南岐曰鳳州此山其交接之界也

三松山在鳳縣東北百里九域志梁泉縣有三松山太平寰宇記三松山一名長松山山有三峯並有長松因名

馬鞍山在鳳縣東南二十里水經注馬鞍水東出馬鞍山通志安河水出此

鳳皇山在鳳縣東三里雍勝略世傳鳳凰嘗集于此一統志一名鷲鷲山

玉皇山在鳳縣東八十里一統志山極高寒不生禽鳥絕頂有大石覆如殿宇

黃牛塞山在鳳縣東北百十里通志宋吳玠將楊從義與金撒離喝大戰於此

興趙原在鳳縣東北方輿勝覽紹興十二年與金分劃乃割秦商之半又棄和尚原方山原以大散關爲界于關內則興趙原爲控扼之所

父子谷在鳳縣北二里太平寰宇記父子谷在梁泉縣東三十里有大小石若相懷抱因名通志唐僖宗幸蜀時至白石鎮有村叟進醴問其居曰父子谷因賜金帛

已上鳳縣

定軍山在沔縣東南十里蜀志建安二十四年先主自陽
平南渡沔水緣山稍前依定軍山勢作營夏侯淵將兵來
爭先主命黃忠乘高攻之斬淵遂有漢中華陽國志諸葛
亮葬定軍山山北臨沔水水經注沔陽故城南對定軍山
隋書地理志西縣有定軍山謹案漢沔陽故城在今縣之
東隋西縣故城在今縣之西
臥龍山在沔縣北一里一統志東連百丈坂上有蓮花池
池上舊有臥龍亭相傳武侯讀書處

白馬山在沔縣西五里水經注瀘水逕張魯治東水西有
山庾仲雍謂之白馬塞太平寰宇記西縣有白馬山張衡
家傳云衡于瀘水口升仙時乘白馬後人遙望山上往往

有白馬往來因名

卓筆山在沔縣南二十里輿地紀勝一峯削出有如卓筆故名元一統志其地名龍門鄉山中有泉通志峯巒削起如筆下有聖水亢旱不涸宋元時每禱雨於此

潭毒山在沔縣西北八十五里雍大記在舊大安軍之三泉今沔縣地宋紹興三年金撒離喝入興元劉子羽築壘於此以扼之

謹案舊大安軍三泉故城俱在今縣西南接寧羌界

鐵山在沔縣北五里通志宋隆興時姚仲置寨於此以禦金人

龍門山在沔縣南六十里何景明仇池諸山記山在官道

傍懸壁環合上透碧虛中敞大洞下漱清泉水簾懸夏冰
柱凝冬宋文潞公宋景文趙清獻王素韓絳呂况呂公弼
呂大防皆有留題行三里又有龍洞蘇元老云自利至興
行五百里幾半蜀道而巖洞之可喜莫如龍洞重簷廈屋
深不可測通志石穴數十其狀如門故名

武興山在沔縣東北十五里通志東臨舊州河西接百丈
坡元褒州城在此自鳳縣南桑坪而入至百丈坡而出長
二百里爲古陳倉道今荒塞沔縣_{已上}

巾子山在略陽縣南三里太平寰宇記山半有洞名硃砂
洞方輿勝覽巾子山一名鳳皇山勢如鳳翔元一統志一

名三峯山首冠羣山高聳萬仞卓然壁立有楊難當祠對融山在其後

大丙山在略陽縣東南七十里又小丙山兩山相通通典順政縣有小丙山有穴太平寰宇記大景小景二山景字本爲丙唐諱改之並在順政縣東南七十里其山峻崖南北相對高百餘丈山衣石髮被於崖際北有穴方圓二丈餘其穴有水潛流土人相傳爲丙穴周地圖記云以其口面丙因以爲名沮水經丙門而過或謂之大丙水每春三月上旬有魚從穴出躍相傳名爲嘉魚左太冲賦所謂嘉魚出于丙穴是此山也

謹案水經注丙水上承丙穴下注褒水據此丙穴當在褒城而杜佑

謂在順政太平寰宇記因以為沮水所經二者不能相合
雍勝略又以寧羌州有嘉魚派為即丙穴其餘在褒沔之
間漢川南北魚洞不一其處通志謂地氣相類魚自穴出
者多而人皆欲假丙穴以美其名紀載或多失實其說信
矣臣又考前代地志所載丙穴不獨在漢中如巴陵昆陽
皆有之而蜀中尤多若邛州大邑縣萬州梁山縣達州明
通縣並稱有丙穴產嘉魚則又紛然不可悉數矣一統志
略陽丙穴蓋本太平寰宇記通志列入沔縣而以略陽之
二景山為誤然考略陽接壤沔縣略陽之東南即沔縣之
西北通志謂在沔縣西北八十里覈其地理與在略陽者
實則一山今從
一統志載之

寶子山在略陽縣西北元一統志相傳其山產金寶故名
相近有萬仞山上有白起寨下枕嘉陵江有門

落叢山在略陽縣西北太平寰宇記在鳴水縣西北十四

里謹案鳴水故城在今縣西一百通志周武帝改落叢郡

以是名也

玉女山在略陽縣東南三十里名山記山高千仞雲霞映之不見其巔山半有白石如人冠冕坐於崖間前有白石數層如人侍立狀

天池山在略陽縣北四十里通志山巔有池方一畝水深丈許冬夏澄澹

八度山在略陽縣北七十里通志四面險阻林木幽深山溪交萃路列三岐要害之區也縣志山接徽縣界爲徽鳳要路

石鑑山在略陽縣東北通志山崖當中有一石片方廣尺

餘光明可鑑

青泥嶺在略陽縣北百五十里九域志長舉縣有青泥嶺

謹案長舉故城在今縣北通志古棧道也後改道於白水江宋余靖過青泥嶺詩

老杜休誇蜀道難我聞天險不同山青泥嶺上青雲客二十年來七往還

飛仙嶺在略陽縣東南四十里方輿勝覽相傳徐佐卿化

鶴昇仙之地上有閣道百間即入蜀大道元一統志此路

舊從西縣過經由沮水宋太平興國五年移改于是嶺唐杜甫

甫飛仙閣詩土門山行窄微徑緣秋毫棧雲闌千峻梯石結構牢萬壑欹疎林積陰帶奔濤寒日外澹泊長風中怒

號歇鞍在地底始覺所歷高往來雜坐臥人馬同疲勞浮生有定分饑飽豈可逃嘆息謂妻子我何隨汝曹

藥水巖在略陽縣南七里嘉陵江上方輿勝覽去沔州城

七里南有二石洞洞有泉能療疾劉異藥水寺詩自注山
上有石乳洞昔人采石乳入此洞中約行半日忽見天色
朗徹奇花異木非凡所有爲白鹿所觸驚迷而回後再遊
大石塞其門矣石今尙存通志兩洞之間有一泉西流入
嘉陵江謂之藥水飲之愈疾上山五里爲石乳洞容千餘
人前有一泉不竭

朝陽洞在略陽縣北百二十里通志在白水江邊懸崖間
亦名藥水洞有鍾乳石蓮花盆承石上水飲之已疾左壁
有瀑布十餘尋

以上略陽

蓮屏山在寧羌州北十里通志羣峯秀聳如蓮花又如屏

障故名

龍門山在寧羌州西北一百五里元和郡縣志縣谷縣水出龍門山輿地紀勝山下有龍洞深七十三步廣半之兩

傍石壁嵌空若龍鱗甲皆具其下皆平石水行其上

宋蘇在廷

龍門洞記自蜀至京四千餘里幾半天下山水之可喜者莫如利三泉自利至興行五百里幾半蜀道巖洞之可喜者莫如龍洞自三泉西行大道不能二里又自大道南行支徑不能百步山舒水湧無他異少焉突有若觀闕者當其前迫而視之則龍門洞也其深七十三步廣半之其兩旁石壁之嵌空突怒者若耳目鼻口鱗甲跟肘俱具其下皆石爲底水紋其上若鋪筦簞石墮其間若設俎豆其兩巖瘦木翠蔓附石而生葳蕤下覆若綴纓珞木蔓之間布水十道後先交映若垂冕旒水落石底其勢跳瀉與石相鬥若濺霜雪其聲鏘鳴與洞相應若響琴筑清寒邃幽殆非人境予不能盡名其狀蓋造物者專爲是瑰奇以聳世俗天地間一尤物耳循洞南升石斷山分棄奇爲平有土

田甚沃有竹箭檜柏松栲雜他卉木甚茂野人居之若桃花源者少西而升不能百步泉湧地中清冷滑甘委迤東下及澗之額而落向之爲布水者此也相傳往往有蟄龍騰去擘巖掀麓而爲此奇峭也淳化間縣令錢侯泳始開游燕之所水自澗出北合嘉陵大江深不可涉橋於澗北閣於澗下館於洞東又橋於洞南亭榭臺圃於洞西以便游者又南而升能三里許路益險山水益秀復得洞焉若重簷廈屋深不可窮有石床甚古水出洞中旣清且冽然以道惡絕無人游歲早禱祀取秋水輒應疑龍之所家以前洞爲門閭而此其堂奧也余蜀人去鄉里往來京蜀凡十數過過未嘗不游游未嘗不飲酒賦詩而去洞中水石草木皆若舊識余同年友李侯山甫爲令於此余家蒙父又爲尉於此書來告余曰願有記也余聞之山川無識以人爲榮辱峴山雖卑以叔子而顯冉溪雖秀以子厚而愚今茲洞之奇冠天下非得奇文無以稱之且文人之過其下者相躡也而獨以屬余何哉嗟夫靈璧之石天下奇玩也蓋僅有巖穴處耳徒以其近於中都故取重當世甚至一拳之微價累千金而彌不可得其亦巧於效技也此洞豈特百倍於靈璧乃蒼然獨秀於遠方不效技於王公貴人之前徒爲田夫漁父之所簡賤高人逸士之所耽翫蓋

其拙有類予者予與舊識而辱以予文之不知山靈尚許之否

魚山在寧羌州西北百五十里輿地紀勝魚山在江北龍山在江南通志魚山在陽平關嘉陵江北巋然獨高頂平而闊相傳昔武侯屯兵于此

天池山在寧羌州東北七十里通志層巒疊嶂迥出羣峯其上有池四時不涸有寒氣逼人莫敢近近則雷電立至

玉簪山在寧羌州東北六十里通志山有要嶺亭爲一郡登覽之要其後最高處爲鷄冠山

金牛峽在寧羌州北九十里今日蟠冢山魏書地形志蟠

冢縣有嶓冢山隋書地理志西縣有嶓冢山通典漢中金
牛縣嶓冢山禹導漾水東流爲漢水通志山有道通隴蜀
東西兩漢界以分流梁益二州雄爲扼塞踞褒沔之上游
爲巴蜀之門戶山下有石牛五爲秦王給蜀所作又名五
女峽水經注來敏本蜀論曰秦惠王欲伐蜀而不知道作
五石牛以金置尾下言能屎金蜀王負力令五丁引之道
成秦使張儀司馬錯尋路伐蜀因曰石牛道蜀王本紀秦
獻美女于蜀王使五丁迎女見一大蛇入山穴中五丁引

蛇山崩五女皆上山化爲石

唐李商隱行至金牛驛寄興元渤海尚書詩樓上春雲水

底天五雲章色破巴牋諸生個個王恭柳從事人人庾杲
蓮六曲屏風江雨急九枝燈檠夜珠圓深慙走馬金牛路

驟和陳王白玉篇胡曾金牛驛詩山嶺千重擁蜀門成都別是一乾坤五丁不鑿金牛路秦惠何由得併吞謹案漢志隴西郡西縣有蟠冢山西漢水所出攷漢西縣在今秦州界桑欽酈道元郭璞諸家並謂禹貢蟠冢山在此自魏移置蟠冢縣于漢沔陽縣地隋卽改爲西縣而蟠冢山于是東徙唐雖于其地立金牛縣而蟠冢之名已定金牛之名不可返矣今特爲訂正

滴水巖在寧羌州北三十里輿地紀勝在大安軍西七十里兩山峭拔其中一峯有飛泉千丈下至山根激石成五花

龍洞在寧羌州東北百里通志自高而下凡丈餘洞三十重皆有二石柱爲之障限內有天生石牀牀下有水不竭遇旱取水雨卽至

嘉魚山在寧羌州南七十里雍勝略在西流河崖畔秋冬水涸則魚藏春夏水漲則魚出味美似鱒故名

壺子臺在寧羌西南四十五里輿地紀勝自韓溪西四十餘里水出巖下成潭潭口湍流成溪下流五里平地突出

一峯如浮圖狀上干雲霄謂之壺子臺

已上寧羌

紫柏山在留壩廳西北四十里太平寰宇記紫柏山在梁泉縣東周地圖記云其山兩頭高狀如龍形一名龍如山

謹案九域志梁泉縣有龍安山疑卽龍如之異名

山多紫柏方輿勝覽山中有七

十二洞仙人多隱于此隴蜀餘聞紫柏山在紫柏嶺南相傳留侯辟穀于此下有留侯祠通志有洞在山頂石壁峻

險人不可到

焦崖山在留壩廳北一百里接兩當界太平寰宇記焦崖山在黃花故城西北四十五里通志一名紅崖山

御愛山在留壩廳東三十里唐韋莊入蜀記大散嶺之北

僖宗巡幸歷山愛玩不能去方輿勝覽御愛山在松林堡

側宋王素御愛山詩當日蒙塵歷險難得逢蒼翠喜開顏吾皇高拱巖廊上只愛生靈不愛山

關中勝蹟圖志卷二十終

關中勝蹟圖志卷二十一

兵部侍郎兼都察院右副都御史陝西巡撫畢沅纂

大川

附水利

漢中府漢水在南鄭縣南三里自褒城縣界流入又東入城固界書孔安國傳沔至漢中東流爲漢水水經漢水又東過南鄭縣南注廉水于縣南北注漢水又右合池水又東得長柳渡元和郡縣志漢水經縣南去縣一百步

褒水在南鄭縣西二十里自褒城界來南流至龍江鋪西小柏鄉入漢通志一名黑龍江

廉水在南鄭縣西南四里自褒城界來東北流入于漢魏

書地形志華陽縣有廉水水經注廉水出巴嶺山北流逕廉川故水得其名又北注漢水太平寰宇記龍岡山北有廉津廉水所經

池水在南鄭縣南十里漢書地理志旱山池水所出東北入漢水經注池水俗謂之獠子水夾漈諸田散流左注漢水太平寰宇記旱山下有石池即池水之源通志今謂之

老猪河源出籠蓋山經城東南十五里北流入漢謹案池水本出

旱山通志又謂出籠蓋山蓋有二源矣老猪聲與獠子相近故誤

壻水在南鄭縣西北又東流入城固界水經注左谷水出西北即壻水也北發聽山山下有穴水穴水東南流歷平

川中謂之壻鄉水

謹案今水經注本壻水壻鄉並書作智六朝人凡壻字皆書作聿因此傳誤也

今並改正

湧泉在南鄭縣北六十一里天臺山雍勝略其泉地中行
人於泉上鑿一井深一尺五寸水深四寸常取此水禱雨
以瓶著井水自湧起注瓶中故名

玉女潭在南鄭縣西南三十里太平寰宇記源從褒城縣
南梁山流入

白鹿池在南鄭縣東北三十里雍勝略相傳有白鹿見於
此

金龍井在南鄭縣城內雍勝略相傳有黃龍見於此

山河大斜堰在南鄭縣西二十里通志褒城山河第一堰

水東流過小斜堰入縣界首築此堰與褒邑分水灌溉又

東五里爲柳葉洞

謹案大斜堰與柳葉洞皆與褒邑共灌田畝下則專灌南鄭

又東八

里爲羊頭堰又東五里爲度通堰又東三里爲小林洞又

東二里爲燕兒窩堰又東一里爲紅巖子堰又東二里爲

姜家洞又東二里爲營房洞又東半里爲李堂洞又東半

里爲李官自褒城縣金華堰至此爲上壩第二堰水又東

流一里爲高橋洞引水東南流分三溝曰中溝東溝南溝

又東一里爲小王官洞又東半里爲大王官洞又東一里

爲康本洞又東半里爲陳定洞又東半里爲祈家洞又東

半里爲花家洞又東半里爲何棋洞又東半里爲高洞子
又東半里爲柳葉洞又東半里爲任家水口又東半里爲
吳家水口又東半里爲王家水口又東爲聶家水口又東
至三皇川設木閘以節水分渠七首曰北高渠次麻溝渠
次上中溝渠次北高拔洞渠次南低中溝渠次柏楊坪渠
次南低徐家渠自高橋洞至此爲下壩凡灌田三萬九千
四百餘畝又東溝自褒城任頭堰分山河第三堰水灌田
千九百餘畝

廉水馬湖堰在南鄭縣西南八十里通志引廉水灌田堰
首在褒城境東流一里入縣界其下流仍入褒城界馬湖

水又東北流爲野羅堰堰首在褒城境流三里入縣界又東北爲嶺堰在縣境其下流入褒城界又東北爲流珠堰堰首在褒城境流五里入縣界又東北爲鹿頭堰堰首在褒城境流五里入縣界又東北爲石梯堰堰首在褒城境流五里入縣界又東北爲楊村堰堰首在褒城境流三里入縣界凡灌田一萬四百餘畝

已上南鄭

漢水在褒城縣南自沔縣界流入又東南入南鄭縣水經注漢水自合黃沙水又東合褒水又東逕萬石城下褒水在褒城縣東一里其上流爲紫金水再下流曰黑龍江俗稱之爲山河史記河渠書孝武帝欲通褒斜道及漕

事拜御史大夫張湯子卬爲漢中守發數萬人作褒斜道
五百餘里道果便近而水多湍石不可漕漢書地理志武
功縣褒水出衙嶺山至南鄭入沔水經注褒水西北出衙
嶺山東南逕大石門歷故棧道下谷俗謂千梁無柱也又
東南逕三交城城在三水之會也一水北出長安一水西
北出仇池一水東北出太白山是城之所以取名矣褒水
又東南得丙水口又東南歷小石門又南歷褒口又南逕
褒縣故城東又南流入于漢括地志褒水出褒城縣西北
九十八里衙嶺山與斜水同源而派分輿地紀勝山河水
卽褒水出太白山謹案衙嶺山太白之支峯也又有石鼓在縣北四十

里褒水中擊之有聲又有將軍石亦在水中入谷十五里
有如兜鍪然又有白玉盆亦在水中大石光白其中可實
五斗方輿勝覽紫金水在河池縣一里源出太白山沿流
至鳳縣武休關入漢中爲山河堰卽褒水也縣志褒水在
縣東門外南流入褒谷至縣南二十里入漢江曰兩河口
廉水在褒城縣西南一百二十五里通志源出巴州密谷
東北流逕雙乳山又北逕中梁山南東北至南鄭界入漢
讓水在褒城縣西南百三十里一名遜水輿地紀勝遜水
起於廉水東流至故廉水城側

謹案廉水故城在今縣南
宋范柏年對明帝臣鄉有

廉泉讓
水卽此

丙水在褒城縣西北水經注丙水上承丙穴下注褒水太平寰宇記丙水源出縣西北牛頭山輿地紀勝大丙水源出黃崖嶺下

武關河在褒城縣北百四十里一名石溝河自鳳縣流逕

武休關東合於褒水水經注所謂一水西北出仇池蓋指

此也

謹案褒水當以出太白山者爲正源而武關河則褒水之別源也

碧玉泉在褒城縣南五十里宋禮部牒山道村有碧玉泉深廣五七丈琉璃色水自下吐出如珠夏潦不溢冬寒不竭

鶴騰泉在褒城縣西南六十里通志源出中梁山由二穴

湧出南注溪中有石梁天成平分兩渠餘水還峽中下注
鶴騰澗爲瀑布焉

山河堰在褒城縣東引褒水灌田一統志蕭何始立爲二

堰

謹案輿地紀勝蕭何始立爲堰後乃語訛爲山字

曹參落成之諸葛亮軍駐漢

中踵跡增築至宋復壞吳玠吳璘相繼修治廣漑民田宋

史河渠志嘉祐中史炤奏上堰法刻石堰上乾道七年吳

玠修六堰濬大小渠六十五宣力最多通志褒水入縣南

流至鷄頭關下築堰截水第一堰名鐵椿堰在縣北三里

今廢褒水南流三里許至縣東門外爲第二堰乃山河堰

之正身也堤長二百六十步其下植柳築坎名曰柳邊堰

分水灌田首為高堰又東流三里為金華堰支分小堰七

曰鷄翁堰沙堰周家堰崔家堰何家堰劉家堰跨槽堰又

東三里為舞珠堰支分小堰五曰魯家堰鄧家堰朱家堰

瞿家堰白火石堰又東五里為小斜堰又東一里為大斜

堰又東五里為柳葉洞謹案大斜堰柳葉洞與南鄭縣分水灌溉凡漑縣境田

三千六百七十餘畝第三堰在城南五里流二里至三橋

洞分兩派西流者為西溝東流者為東溝東溝東流七里

許至任頭堰又分二派西為西渠其東流者入南鄭界凡

漑縣境田六百餘畝宋楊絳重修河堰記乾道元年四川宣撫使判興州吳公朝行在所上寵

嘉之拜上公進爵真王仍以奉國節髦移鎮漢中粵自用武而來戎馬充斥民事浸緩公至則曰國基于民而民以

食爲天凡所以飽我師彊吾國者民也民事固緩而恬不加恤是不知本之甚也其可乎哉乃申飭僚吏件其詔令之忠厚愛民與夫政事之偏而不起者次第施行之給和糴之緡而人無白著停踰時之賦而困窮以蘇兼並均敷悍黠費貸嚴而不苛寬而有制至若剗蠹除害惠澤流布家至戶到共知樂業明年春農務未舉公首訪境內溉浸之原其大者無如漢相國曹公山河堰導褒水限以木石順流而疏之自北而西者注于褒城之野行于東西者悉歸南鄭之區其下支分派別各遂地勢周溉田疇之渠百姓饗其利惟時二邑久矣怠作每歲鳩工度材以鉅萬計將有事于溝洫狡獪者贏其財僥倖者嗇其土重以異時小夫賤隸染汙習熟賣丁□□□□□□以故無告蒙告澤不下究公慨然念之銳意改作與提典刑獄兼常平使者祕閣張公商權利病先事設備偕詣堰所擊鮮格神涓日起役畚鍤如雲萬指齊作乃檄通判軍府事史祈俾總督之僅兩浹旬斷手凡用工若材視曩爲省而增創護岸之堤又數百丈祈會邑宰宣勞彈力往來其間申畫畔岸以杜分爭檢校精換以別勤惰如公指揮人自知畏不擾而辦先是光道撻積幣墮廢踰二十年而堰水下流惟供豪右輪杵之用異時沃野皆化瀉鹵民實病之公又躬卽

其處相方度宜□□穿渠料簡卒徒官給財用分授方略
佚道使之刻期而就凡以工計者又十萬有奇□□□□
□雖廣能周漑三萬餘畝瀉鹵復爲上腴訖事而民弗預
抑又難焉欽惟我公威名駿烈爲社稷之衛而司全蜀之
命者歷三紀矣逮茲保釐功崇位極乃復推原本始篤意
民事爲朝廷固不拔之基與黔首垂無窮之福殆非識慮
淺近者之所能爲也曹爲異代創業之輔公實今日中興
之佐先後相望千有餘歲其愛民利物之心及所成就不
約而同可謂盛德事也召父杜母何足擬倫褒中之石幸
可磨鐫辭雖不腆絳職在是庸敢直言昭示來世謹案碑
乾道中立所稱
吳卽吳璘也

廉水馬湖堰在褒城縣西南一百里通志自縣境梁家營
築堰南流入南鄭界又流一里入縣界又東北流二十里
爲野羅堰堰在縣界下流入南鄭界又東北流三里爲馬
嶺堰堰首在南鄭境又東北流三里爲流珠堰堰在縣境

流五里入南鄭界又東北流六里為鹿頭堰堰在縣境五

里入南鄭界又東北流石梯堰堰在縣境流五里入南鄭

界又東北流為楊村堰流三里入南鄭界謹案石梯楊村堰首雖在褒邑

而所溉皆南鄭田凡溉縣境田四千五百六十餘畝已上褒邑不沾其利

漢水在城固縣南四里自南鄭界流入又東入洋縣界水

經注漢水自長柳渡又東右會盤余水又東左會文水又

東黑水注之又東過城固縣南又東過安陽縣南泔水出

自旱山北注之又左合壻水謹案安陽故城在今縣東元和郡縣志漢

水經縣南去縣二里

盤余水在城固縣西南三十里水經注盤余水出南山巴

嶺上泉流兩分南入蜀水北注漢津謂之盤余口庾仲雍

曰盤余去胡城二十里

謹案胡城在今縣西

通志即名南沙河出縣

西南黑龍洞又小沙河在縣南十里曹林壩北流入漢

文水在城固縣西北四十里水經注文水即門水也出北

山石穴中長老云杜陽有仙人宮石穴宮之前門故號其

川為門川水為門水雍勝略文水兩水合流有如文字

謹案

宋范柏年對明帝臣鄉有文川武鄉即此

黑水在城固縣西北五里水經注黑水出北山南流入漢

庾仲雍曰黑水去高橋三十里

謹案高橋即文水注漢之處

諸葛亮牋

云朝發南鄭暮宿黑水四五十里指謂是水也括地志黑

水源出梁州城固縣西北大山謹案方輿紀要謂黑水即

為證然覈其地理褒城在南鄭之西城固在南鄭之東褒

水發源褒城西北之衙嶺山南流至南鄭之小柏鄉已入

于漢又安得以發源城固北山之

水而指為即褒水乎今不取其說

泚水在城固縣南即鬻谷水也漢書地理志安陽縣鬻谷

水出西南北入漢謹案顏師古漢書注曰鬻音潛其字亦

非是又史記沱

潛之潛皆作泚

壻水在城固縣東北六里自南鄭界來南流入漢水經注

唐公房成固人也升仙之日壻行未還不得同階雲路約

以此川為居因號曰壻鄉故水亦即名焉又南歷壻鄉溪

東南流逕通關勢南又東逕七女冢又逕樊噲臺南又東

南逕大城固北東迴南轉又逕其城東而南入漢水謂之
三水口府志壻水源出太白山東流逕縣北又東南入漢
又有上中下清溪在縣北七十里源出馬盤山南流合于
壻水

玉谷泉在城固縣西北二十里輿地紀勝漢水紀云漢水
自魏興沂流一百八十里至玉谷溪口卽是也縣志玉谷
泉源出扁鵲觀之龍洞流入文水

七女池在城固縣東北水經注壻水東逕七女冢水北有
七女池漢中記昔人無男養七女父歿女于此負土成冢
遂成此池

明月池在城固縣東北水經注七女池東有明月池狀如
偃月雍勝略明月池中有臺相傳漢高祖所築謹案七女

水自相通注其通注之處謂之
張良渠舊傳良所開者卽此

壻水渠高堰在城固縣西北四十里通志引壻水灌田南
流繞慶山而出于山下築一堰名百丈堰堰常有暴水衡
淤明萬歷間建石橋以閘暴水仍於兩岸築堤渠遂無所
患壻水又東爲五門堰堰有五門以洩山水元至元間前
明及本朝康熙間先後修築分水車九輛及七洞以溉田
壻水又南爲楊墳堰謹案宋楊從義於河內填堰截壻水
成此堰因名亦名截河堰
東南流爲幫河堰又東南流有六洞及鵝兒堰新堰而入

洋縣界凡漑縣境田三萬六千八百餘畝

北沙河上官堰在城固縣西三十里通志引北沙河水於

東岸作堰又南流西岸有西小堰又南流西岸有棗兒堰

凡漑田三千七百餘畝謹案北沙河卽文水馬理陝西通志有鄒公橫渠二堰今無考

南沙河萬壽堰在城固縣西南十五里通志引南沙河于

東岸作堰河水又北流五里西岸有上盤堰古名盤蛇堰

稍下爲下盤堰又北流五里東岸有新堰稍下爲平沙堰

又北流五里西岸有沙平堰稍下爲蓮花堰又北流十里

東岸有倒流堰凡漑田七千一百餘畝

小沙河東流堰在城固縣南五里通志在東岸故名東流

其在西岸者曰西流堰凡灌田七百餘畝謹案馬理陝西通志縣南引小

沙河者有承沙周公二堰今廢已上城固

漢水在洋縣南二里自城固界流入又東入西鄉界水經

注漢水自合壻水又東會益口又東至灊城南與洛谷水

合又東逕小城固南謹案小城固故城在今縣東又東歷上濤而逕于

龍下蓋伏石驚湍流屯激怒故有上下二濤之名謹案今縣東二

里為飲馬潭又五里為上濤下濤龍下地名也度此溯洄從漢為山行之

始又東逕石門灘謹案上下濤東二十里為鴛鴦灘又三十里為石門灘山峽也東

會酉水又東逕媯墟灘謹案今名蒿溪灘又東逕猴徑灘謹案今名此狗

灘又東逕大小黃金南謹案過狗灘二十里東即今名大小金灘又東合濠

蔭溪口元和郡縣志漢水經興道縣南去縣百步太平寰宇記漢水自發源至此屈曲行三百七十里流入金州漢陰縣界

壻水在洋縣西四十里輿地紀勝經城固縣壻鄉又東流入縣境二十里入漢

益水在洋縣西二十五里水經注益水出北益谷東南流注於漢水通志今名溢水河

灋水在洋縣西一里卽洛谷水水經注洛谷水北出洛谷谷北通長安其水南流右則灋水注之水發西溪東南流合爲一水亂流南出際灋城西南注漢水魏書地形志龍

亭縣有灑水太平寰宇記灑谷水一名洛谷水在興道縣

北三十里南流注于漢謹案今縣北一百八十里
有鐵冶河或云即灑水

龍涓水在洋縣東北三十里輿地紀勝龍涓水在興道縣

東二十九里水出龍涓谷屈曲西南流十五里入漢江通

志一名大小龍溪水在洋縣石上有赤書展溪二字相傳

為張魯女感孕生二龍之所謹案龍涓水
或云即龍下

西水在洋縣東十里水經注西水北出秦嶺西谷南歷重

山與寒泉合水東出寒泉嶺泉湧山頂望之交橫似瀑布

頽波激石散若雨灑勢同厭原風雨之池其水西流入于

西水西水又南注漢謂之西口謹案雷次宗豫章記厭源
山西北有洪井井北五六

里有風雨池山高瀨急霏散遠
灑若雨道元之說與之正同

蘧蔭水在洋縣東百里一名黃金水水經注蘧蔭水北出
就谷其水南流逕巴溪戍西又南逕陽都坂東又南歷蘧
蔭溪謂之蘧蔭水而南流注于漢謂之蔭口元和郡縣志
黃金水源出縣西百畝山黃金谷南流經縣西去縣九里
太平寰宇記黃金水在黃金縣西十里南注漢水

潛水在洋縣東六十里通志源出華陽山東南流入漢

謹案

禹貢梁州潛水在廣元縣此水及城
固之洿與經無涉雍勝略諸書皆誤

子午河在洋縣東北縣志蒲河源出秦嶺南流會椒溪文
水二河名三河口又至白沙鋪名子午河南流入漢

楊填堰在洋縣西五十里通志引壻水自城固至留村入

縣界首爲梁家洞

謹案此尚與城固分水
下則止灌縣境田矣

又東南爲新聞

洞其北岸爲倪家渠魏家渠又東南爲柳家洞又東南爲
磨眼洞又東南爲宿龍洞又東南爲趙家洞又東南爲黃
家洞又東南爲漢龍洞又東南爲水磨堰洞又東南爲分
水渠其北岸爲北高渠又下爲野狐洞又東南入漢江凡
漑縣境田一萬八百餘畝

溢水堰在洋縣西北二十里通志源出縣北秦嶺南流五
里於東岸築堰分水東南流下爲小飛槽又下爲大飛槽
爲鑿坂堰爲腰渠爲西渠爲石堰渠爲吳家渠爲北渠爲

南渠溢水又南流五里於西岸築堰引水西南流爲二郎堰又下爲高堰洞又下分兩派東流者爲東渠西流者爲西渠溢水又南流五里於下流截河爲堰從東岸分水與溢水偕行而南者爲三郎堰凡溉田二千四百餘畝

灤濱堰在洋縣北十五里通志源出縣北石鏗山南流至周家坎於西岸築堰分水西南流者爲灤濱堰灤水又南流五里於東岸築堰分水東南流者爲土門堰灤水又南流四里許截河築堰從東分水流至縣西關外者爲斜堰下流分東西二渠其地居灤水下流歲苦衝溢明萬歷間磬石截渠道灌溉賴之凡溉田三千四百餘畝

已上洋縣

漢水在西鄉縣東北百二十里自洋縣流入又東南流入石泉界水經注漢水自合蘧蔭水又東右會洋水川流漫闊廣幾里許又東歷敖頭

洋水在西鄉縣東二十里水經注洋水導源巴山東北流

逕平陽城又東北流入漢謂之城陽水口謹案平陽城即西鄉舊縣在今

縣南隋書地理志西鄉縣有陽水元和郡縣志洋水在洋源

縣南三百步又逕西鄉縣南八里謹案洋源廢縣在西鄉縣南太平寰

宇記洋水出廢洋川縣東巴嶺北流入黃金縣界謹案洋川故城

在縣南黃金縣今屬洋縣界縣志洋河在西南三百里源出星子山流

逕縣東合于木馬河

馬源水在西鄉縣南百步輿地紀勝馬源水源出巴山圖經云本名木馬水天寶中改今名縣志木馬水源出大巴山在縣南二百八十里縣西南之左西峽空渠水及縣北之清涼川縣南之金竹水皆注焉又東北入于漢

清涼川在西鄉縣北五里蒿坪山下太平寰宇記唐德宗幸梁洋西南節度使嚴震具軍容迎謁於清涼川卽此縣志縣北有清涼山洋水經其下別流謂之清涼川亦名清源水

七十二渡河在西鄉縣東南三百五十里雍勝略源出金竹山其水滌洄凡七十二渡北流入洋河

楮河在西鄉縣東南二百里通志又有大石川河入紫陽

界合於楮河

謹案即紫陽縣小石河也

流洋堰在西鄉縣東南二十里一統志在子午山左有大

渠一分小渠二十五明景泰初築漑田四千六百畝

已上西鄉

故道水在鳳縣北一里自鳳翔府寶雞縣流入又西南入

秦州兩當縣界水經注兩當水出陳倉縣之大散嶺西南

流入故道川謂之故道水又西南經故道城東與馬鞍山

水合又西南流北川水注之

謹案陳倉今屬寶雞故道故城在縣東

元豐九

域志故道水自大散關西南有嘉陵谷即嘉陵水所出自

是始有嘉陵江之名方輿勝覽嘉陵江源出大散關之西

去鳳州九十里雍大記嘉陵江在沔縣西北百八十里案
類要云其源出大巖縣志云出大散關西恐卽大巖也逕
鳳縣北微縣東兩當南略陽西迤邐而入川江灘石險惡
至漁關始通舟楫謹案水經注西漢水西逕蘭倉城南又
南入嘉陵道爲嘉陵水蘭倉嘉陵皆今
秦州禮縣地則是西漢水至禮縣始名嘉陵水今則鳳縣
之故道水與成縣之白水江皆名嘉陵蓋皆嘉陵上流故
得通稱也

大散水在鳳縣東北十里太平寰宇記大散水出黃花縣
東界大散嶺流逕縣西去城十步方輿勝覽大散水流入
黃花川唐有黃花縣

馬鞍山水在鳳縣東二里水經注馬鞍山水歷谷西流至

故道城東西入故道水通志今俗名斜谷水謹案此別是一水非郿縣

之斜谷水

扞水在鳳縣東北又東北流入寶雞界水經注扞水出周道谷北逕故道縣故城西又東北歷大散關西入渭

梁泉在鳳縣西十里元和郡縣志縣西有梁泉雍勝略梁

泉亦曰鳴玉泉謹案後魏以此名縣梁字亦作涼已上鳳縣

漢水在沔縣城南謹案漢水至此為沔水古稱也自寧羌界流入又東入

褒城界書禹貢浮於潛逾於沔孔安國傳漢上曰沔漢書

郊祀志秦祠沔於漢中如淳注此方人謂漢水為沔水水

經注沔水東南流注漢曰沮口所謂沔漢者也又東逕白

馬戍南澧水入焉又東逕武侯壘南又東逕沔陽故城南

又東逕西樂城北容裘溪注之又左得度水口又東合温

泉又東黃沙水注之謹案西樂故城在今縣東南元和郡縣志漢水去

鐸水縣一里謹案鐸水故城在今縣東南縣志明珠曲亦曰明支曲在

縣南即漢江洄曲處

澧水在沔縣城西三十步水經注澧水北發武都氏中南

逕張魯城中又南逕張魯東對白馬城謹案今俗以此水為白馬河又

南流入沔謂之澧口太平寰宇記澧水源出西縣北四十

五里獨石谷南流逕縣西二百步注漢水府志龍門溝在

縣西北一里即澧水也東為臥龍山西為烽燧山其中如

門故名

度水在沔縣東二十五里水經注度水出陽平北山有二

源一曰清檢一曰濁檢南逕陽平縣故城東又南逕沔陽

縣故城東而南流注於漢水通志今縣之舊州河

謹案陽平故城

在今縣東北

容裘溪水在沔縣南水經注容裘溪水出容裘谷俗謂之

洛水水南遵巴嶺山東北流又北逕西樂城東而北流注

于漢縣志今謂之養家河自褒城界大鐵廠來逕縣之鎮

阜川北流至黃沙驛入於漢

溫泉水在沔縣東南四十五里水經注漢水又東右會溫

泉水口水發山北平地方數十步泉源沸涌冬夏湯湯望
之白氣浩然言能瘥百病浴者皆有硫黃氣池水通注漢
水輿地紀勝溫泉在西縣東南三十五里鳳皇山之南

謹案

今俗以此泉
爲金泉水

黃沙水在沔縣東四十里水經注北出遠山山谷邃險人
跡罕及谿曰五丈谿水側有黃沙屯其水南注漢水輿地
紀勝縣西有青羊峽黃沙水所出

三泉水在沔縣西八十里南流二十里入漢太平寰宇記
在三泉故縣北二十里山下縣以此名輿地紀勝在大安
軍東門外瀕江石上有泉三處大如車輪品列鼎峙泉流

涓涓下注水旱無盈縮

沮水在沔縣西三十里述異記漢沔會流處岸上有石銘云下至水府三十一里傳為李斯刻石縣志沮水出縣北百八十里母豬山南流逕縣北又南入漢

東池在沔縣東三十里通志沔水所溢相傳為唐賈島避暑之所

石刺塔堰在沔縣東北三十五里通志引舊州河水分兩派東流者為山河東堰西流者為山河西堰凡溉田六千九百餘畝

石燕子堰在沔縣東北三十里通志引黃沙河水分兩派

東流者爲天分東堰西流者爲天分西堰凡漑田四千一百餘畝

琵琶堰在沔縣南三十里通志引養家河水首爲琵琶堰又北爲馬家堰又北爲麻柳堰又北爲白馬堰一名白崖堰又北爲天生堰又北爲金公堰又北爲澆水堰又北爲康家堰凡漑田五千八百餘畝

已上沔縣

西漢水在略陽縣城西自成縣流入南入寧羌州亦曰嘉陵江漢書地理志西漢水出西縣蟠冢山南入廣漢白水東南至江州入江水經注西漢水自會修水又東南於槃頭郡南與濁水合又東南歷漢曲逕挾崖與挾水合

謹案今名

橫見河在縣西十五里又東逕武關城南東南與北谷水合又西南

逕關城北謹案槃頭故郡在今縣北關城即今陽平關在寧羗州通典秦州上邽縣

蟠冢山西漢水所出經嘉陵曰嘉陵江元和郡縣志嘉陵

水經長舉縣南十里又經順政南百步謹案長舉故城在今縣西北唐

書地理志元和中節度使嚴礪自長舉縣西疏嘉陵江二

百里雍大記西漢水在西和縣源出蟠冢山雍勝略犀牛

江在縣西北百二十里又名東西淮自階州東流入嘉陵

江府志犀牛江源出禮縣自西淮而下舟楫可通流至兩

河口合嘉陵江唐杜甫聽嘉陵江水詩鑿崖泄奔湍古稱神禹跡夜喧山門店獨宿不安席水性自

云靜石中本無聲如何兩相激雷轉空山驚薛逢咏嘉陵江水詩借問嘉陵江水湄百川東去爾西之但教清淺源

流在一路朝宗會在期謹案西漢水源有三出西和縣蟠豕山一源也至略陽縣北合白水江二源也至鳳縣東合故道水三源也水經注自西和流經禮縣成縣者為嘉陵正源即所謂淮河者是也今俗以淮河為犀牛江白水故道水目為嘉陵江是循流而忘其源矣雍勝略府志等皆沿其誤今特為正之

故道水在略陽縣北百二十里通志自大散關分水嶺之南逕鳳縣又逕徽縣至大魚關可通舟楫又至縣北合白水江又至兩河口合淮河又合橫見河逕縣城西南又合夾渠入渡二水又合樂素河逕陽平關至廣元縣入蜀謹案

樂素河一作落索河其水東南流入故道水

濁水在略陽縣北百二十里謹案濁水即白水也宋時依之開路謂之白水路水

經注濁水自合故道水又南逕槃頭郡而南合鳳溪水謹案

隋書地理志長舉縣有鳳溪水寰宇記左溪水在鳴水縣西南七里左溪即鳳溪也其水自栗亭北合于西漢水

又南注漢水

青泥水在略陽縣西北一百五十里通志源發成縣至石

門入嘉陵水

唐柳宗元興州江運記御史大夫嚴公牧于梁五年嗣天子用周漢進律增秩之典以親

諸侯謂公有功德理行就加禮部尚書是年四月使中謁者來錫公命賓僚吏屬將校卒士鰲老童孺填溢公門舞

躍歡呼願建碑紀德垂億萬祀公固不許而相與怨咨惶

遑如不飲食于是西鄙之人密以刊山導江之事願刻巖

石曰維梁之西其蔽曰某山其守曰興州興州之西為戎

居歲備亭障實以精卒以道之險隘兵困于食守用不固

公患之曰吾嘗為興州凡其土人之故吾能知之自長舉北至於青泥山又西抵於成州過栗亭川踰寶井堡崖谷峻隘十里百折負重而上若蹈利刃盛秋水潦窮冬雨雪深泥積水相輔為害顛踣騰藉血流棧道糗糧芻藁填谷委山牛馬羣畜相藉物故運夫畢力守卒延頸嗷嗷之聲其可哀也若是者綿三百里而餘自長舉而西可以導江

而下二日而至昔之人莫得知也吾受命于君而育斯人其可已乎乃出軍府之幣以備器用卽山蹴工由是轉巨石撲大木焚以炎火沃以食鹽摧以堅剛化爲灰燼畚鍤之下易甚朽壤乃闢乃墾乃官乃理隨山之曲直以休人力順地之高下以殺湍悍厥功旣成咸如其素于是決去壅土疏導江濤萬夫呼抃莫不如志雷騰雲奔百里一瞬旣會旣遠澹爲安流蒸徒謳歌枕臥而至戍人無虞專力待寇惟我公之功疇可侔也而無以酌德致其大願又不可得命矧公之始來屬當惡歲府庾甚虛器備甚殫饑饉昏札死徙充路賴公節用愛人克安而生老窮有養幼乳以遂不問不使咸得其志公命鼓鑄庫有利兵公命屯田師有餘糧選徒練旅有衆孔武平刑議獄有衆不黷增石爲防膏我稻梁歲無凶蓄家有積倉傳館是飾旅忘其歸杠梁以成人不履危若是者皆以兵隙帥士而爲之不出四民之力而百役以就且我西鄙之職官故不能具舉惟公和恆直方廉毅信讓敦尚儒學抑損貴位率忠與仁以厚其誠有可以安利于人者行之堅勇不俟終日其興功濟物宜如此其大也昔之爲國者惟水事爲重故有障大澤勤其官而受封國者矣西門遺利史起興嘆白圭壑隣孟子不與公能夷險休勞以惠萬代其功烈尤章章焉不

可蓋也是用假辭碣工勒石存之用永憲于後祀

北谷水在略陽縣東八十步自徽縣來經城西南入嘉陵江水經注北谷水出武興東北而西南流逕武興城北又南轉逕其城東而南與一水合水出東溪西流注北谷水又南流注漢水太平寰宇記黃坂水在順政縣東一里府志百八渡水源發三川衆水合流經一百八渡遶城東南會夾渠水入嘉陵江其夾渠河在縣東二里發源飛仙嶺西流入八渡謹案百八渡水即水經注之北谷水太平寰宇記之黃坂水而夾渠水即水經注之東溪也水也

沮水在略陽縣東北百二十里漢書地理志沮縣沮水出

東狼谷南至沙羨南入江謹案沮縣故城在今縣東沙羨今屬湖廣漢陽縣水經

沔水出武都沮縣東狼谷中注一名沮水闕駟曰以其初

出沮洳然故曰沮水縣亦受名焉導源南流泉街水注之

又東南經沮水戍而東南流入漢曰沮口所謂沔漢者也

謹案水經注亦以沮水為漢源元和郡縣志沮水出順政縣東北八十二

里元豐九域志順政縣有沮水

泉街水在略陽縣東北漢書地理志河池縣泉街水南至

沮入漢謹案河池今屬鳳縣水經注泉街水自河池縣東南流入沮

縣會於沔已上略陽

漢水在寧羌州東北東南流入沔縣界書禹貢蟠冢導漾

東流爲漢孔安國傳泉始出爲漾水東南爲沔水至漢中東流爲漢水山海經蟠冢之山漢水出焉東南流注於沔漢書地理志東漢水一名沔水水經注山海經所謂漢出鮒鰕山也東北流得獻水口漢水又東北合沮口同爲漢水之源通典漢中金牛縣蟠冢山禹導漾水東流爲漢水亦曰沔水宋陸游文集嘗登蟠冢山有泉涓涓出山間是

爲漢水之源卽安國傳所謂泉始出山爲漾者也

謹案漢水始出

爲漾合沮爲沔東流爲漢陸游以蟠冢在此故以沔爲漾也

蜀道驛程記出沔縣西門

曲折行亂山中沔水流經其中西涉沮水抵大安驛沔沮之間闊者未丈許狹者纔二三尺沙石磷磷深不沒踝自

大安西南亂山益稠至金牛驛北望蟠冢岷然雲表一小
水自西東流卽所謂蟠冢導漾者也水纔濫觴不沒鳧雁
合五丁峽水東流爲沔其流始大又自寧羌州行十里渡
水過百牢關關下有分水嶺嶺東水皆北流至五丁峽北
合漾水入沔嶺西水皆南流逕七盤關龍洞合嘉陵水爲
川江

西漢水在寧羌州西北百里自略陽界流入又西南入四
川廣元縣界水經注西漢水自合北谷水又西南逕關城
北除水出西北除溪東南流入于漢漢水又西南逕通谷
合通谷水

謹案水在今州北百二十里俗名燕子河

又西南寒水注之

謹案今州南六

十里有西流河一名韓溪即此水輿地紀勝云韓溪水源出昆山里礮洞山下又西逕石亭戍廣

平水東南流注之元和郡縣志嘉陵江經金牛縣西去縣

三十里謹案金牛故城在今州東北太平寰宇記嘉陵江在三泉縣西

半里謹案三泉故城在今州西北

廣平河在寧羌州西北陽平關西水經注廣平水西出百

頃川東南流注漢通志其水南入嘉陵江

瀕倉河在寧羌州東北九十里通志逕鐵佛寺東流四十

里入漢一名東流河謹案此即沔縣之三泉水也

玉帶河在寧羌州城北通志源發州南箭竹嶺流逕城西

北而東復會于東南盤曲若帶圍然故名又東至沔縣入

漢又有泗水河在州西二十里曲折南流十五里合於玉帶河

蓮花池在寧羌州西門外府志南山如屏障小山聯絡如畫灘聲清響如雜絲竹

七里堰在寧羌州西南七里通志堰洄水灌田千餘畝已

北川水在留壩廳北八十里水經注北川水出北洛燹山

南南流逕唐倉城下又南至困冢川入故道水謹案唐倉故城在今

廳境之北通志今名紅崖河水源出秦州南流至唐倉合小谷

又流至兩當界入嘉陵江

野羊河在留壩廳東北五十里通志源出紫柏山東流至廢邱關與東溝河合

紫金水在留壩廳東南六十里方輿勝覽紫金水在河池

縣北一里源出太白山沿流至鳳州武休關入漢中為山

河堰即褒水也謹案唐于鳳州置河池縣

西溝水在留壩廳東南通志源出安山驛南逕武關入黑

龍江

東溝水在留壩廳西南通志源出三岔驛合野羊河

蒿壩河在留壩廳東北通志其水流入紫金水已上留壩廳

關中勝蹟圖志卷二十一終

關中勝蹟圖志卷二十二

兵部侍郎兼都察院右副都御史陝西巡撫畢沅纂

古蹟 第宅

漢中府蜀諸葛武侯宅在沔縣西南水經注沔水又東逕武侯壘南諸葛武侯所居也

宋范柏年宅在南鄭縣西南梁州記范柏年漢中人謁宋明帝因語廣南貪泉柏年對曰臣郡有文川武鄉廉泉讓水臣所居在廉讓之間卽此

唐草涼樓在鳳縣東北六十里元一統志舊相傳明皇駐蹕于此

望雲樓在洋縣北一統志世傳唐德宗幸梁洋嘗登是樓御題十字于梁上及還京鑿取以歸

秋興亭在沔縣舊治內一統志唐刺史賈載所築

宋石柱堂在府治內府志文同建又有臨漢堂四照亭綠

景亭凌雲榭皆同所締造

襲美堂在洋縣治內一統志韓億韓絳父子相繼知州事

有美政洋人德之為建此堂宋宋華韓公襲美亭記宋臣之盛未有如韓氏者初尚書

左丞贈太子少傅忠憲公億大丞相魏國公琦皆進士崛起蔚然勳德相望及其父子兄弟一門四世為賢卿相議

者源流相委皆忠憲公所出蓋天之阜昌韓氏未有艾也夫豈其然耶祥符間忠憲公以太常博士出守洋州實生

仲子僕射公絳後五十年繼領郡事是歲嘉祐五年洋人德之士大夫榮之為作襲美堂二公亦不鄙夷也皆賦詩

見意遺洋人爲力鼎重蓋自祥符歷嘉祐以迄於今踰百
五十禩邦人頌而歌舞之不少衰焉噫天之生斯人將以
爲宗社華夷之福而洋再私之其爲榮幸宜如何異時洋
居敵衝凡城邑官府大略灰燼之餘而堂久墟矣惟二公
慈惠之政風雅之什根于人心傳于翰墨夜光絢燦獨與
天漢俱永豈亦有神物護持之耶乃相與囑其父老而告
之曰吾聞春秋之世韓獻子有大功于趙故宋興韓世亦
興今乃國家再造其子孫尚多賢汝曷迹二公遺口勒諸
金石而往告之且賀其必有興者父老咸歡喜踴躍再拜
以請曰碑立矣漢水在此公言不食并詮其詞刻之以傳
不朽

郡圃在洋縣治北一統志文同知洋州卽唐時舊圃飾其

臺榭政暇賦詩蘇軾遙和之宋蘇軾和文與可洋州園池
二十絕湖橋詩朱闌畫柱照

湖明白葛烏紗曳履行橋下龜魚晚無數識君拄杖過橋
聲橫湖詩貪看翠蓋擁紅粧不覺湖邊一夜霜卷卻天機
雲綿段從教匹練寫秋光書軒詩雨昏石硯寒雲色風動
牙籤亂葉聲庭下已生書帶草使君疑是鄭康成冰池詩

不嫌冰雪遶池看誰似詩人巧耐寒記取羲之洗硯處碧
琉璃下黑蛟蟠竹塢詩晚節先生道轉孤歲寒唯有竹相
娛麤才杜牧真堪笑喚作軍中十萬夫荻浦詩雨折霜乾
不耐秋白花黃葉使人愁月明小艇湖邊宿便是江南鸚
鵝洲蓼嶼詩秋歸南浦蟪蛄鳴霜落橫湖沙水清臥雨幽
花無限思抱叢寒蝶不勝情望雲樓詩陰晴朝暮幾回新
已向虚空付此身出本無心歸亦好白雲還似望雲人天
漢臺詩漾水東流舊見經銀潢左界上通靈此臺試向天
文覓閣道中間第幾星待月臺詩月與高人本有期挂簷
低戶映蛾眉只從昨夜十分滿漸覺冰輪出海遲二樂榭
詩此間真趣豈容談二樂并君已是三仁智更煩詞妄見
坐令魯叟作瞿曇灑泉亭詩聞道池亭勝兩川應須爛醉
答雲烟勸君多揀長腰米消破亭中萬斛泉吏隱亭詩縱
橫憂患滿人間頗怪先生日日閑昨夜清風眠北牖朝來
爽氣在西山霜筠亭詩解籜新篁不自持嬋娟已有歲寒
姿要看凜凜霜前意須待秋深粉落時無言亭詩慙慙稽
首維摩詰敢問如何是法門彈指未終千偈了向人還道
本無言露香亭詩亭下佳人錦繡衣滿身瓔珞綴明璣晚
香消歇無尋處花已飄零露已晞涵虛亭詩水軒花榭兩
爭妍秋月春風各自偏惟有此亭無一物坐觀萬景得天

全谿光亭詩決去湖波尚有情卻隨初日動簷楹谿光自
古無人畫憑仗新詩與寫成過谿亭詩身輕步穩去忘歸
四柱亭前野約微忽悟過溪還一笑水禽驚落翠毛衣披
錦亭詩烟紅露綠曉風香燕舞鶯嘯春日長誰道使君貧
且老繡屏錦帳咽笙簧禊亭詩曲池流水細鱗鱗高會傳
觴似洛濱紅粉翠蛾應不要畫船來往勝於人齒蒼亭詩
日日移床趁下風清香不盡思何窮若爲化作龜千歲巢
向田田亂葉中茶蘼洞詩長憶故山寒食夜野茶蘼發暗
香來分無素手簪羅髻且折霜蕤浸玉醅篋管谷詩漢川
修竹賤如蓬斤斧何曾赦籜龍料得清貧饒太守渭川千
畝在胸中野人廬詩少年辛苦事犁鋤剛厭青山遶故居
老覺華堂無意味却須時到野人廬寒蘆港詩溶溶晴港
漾春暉蘆笋生時柳絮飛還有江南風物否桃花流水紫
魚肥此君庵詩寄語庵前抱節君與君到處合相親寫真
雖是文夫子我亦真堂作記人香橙徑詩金橙縱復里人
知不見鱸魚價自低須是松江煙雨裏小船燒薤擣香齏
南園詩不種天桃與綠楊使君應欲候農桑春畦雨過羅
紈膩夏壠風來餅餌香北園詩漢水巴山樂有餘一麾從
此首歸塗北園草木憑君問許我他年作主無蘇轍詩冰
池詩水深冰亦厚滉蕩鋪寒玉好在水中魚何愁池上鷺

書軒詩綠竹復新渠塵心日日疏使君遺癖在苦要檢文
書披錦亭詩春晚百花齊綿綿巧如織細雨洗還明清風
卷無迹橫湖詩湖裏種荷花湖邊種楊柳何處度橋人問
是人間否湖橋詩湖南堂宇深湖北林亭遠不作過湖橋
兩處那得見望雲樓詩雲生如湧泉雲散如翻水百變亦
凭樓悠悠定誰使待月臺詩夜色何蒼蒼月明久未上不
上倚城臺無奈東西嶂二樂榭詩動靜惟所遇仁智亦偶
然誰令二物外猶見天地全瀟泉亭詩泉來草木滋泉去
池塘滿委曲到庭除清冷備晨盥吏隱亭詩隱居亦非難
欲少求意遂有意未成歸聊就茅簷試霜筠亭詩高林日
氣薄竹色淨如洗寂歷斷人聲時有鳴禽起無言亭詩處
世欲無言事至或未可惟有此亭空燕坐聊復我露香亭
詩重露覆千花繁香凝畦圃不忍日將晞散逐微風去涵
虛亭詩虛亭面疎篁窈窕衆景聚更與坐中人行尋望來
處過溪亭詩溪淺復過橋過者猶恨懶賴有溪上鷗常爲
獨遊伴禊亭詩觴流無定處客醉醒還酌毋令仲御歌空
使人驚愕菡萏亭詩開花濁水中抱性一何潔朱檻月明
時清香爲誰發野人廬詩野人三四家桑麻足生意試與
扣柴荆言詞有餘味此君庵詩風梢遶簷匝霜幹當窗靜
遙知素壁上墨醉森相映香橙徑詩葉如石楠堅實比霜

柑大穿徑得新苞令人憶鱸膾茶麩洞詩猗猗翠蔓長藹藹繁香足綺席墮殘英芳樽清餘馥南園詩官是勸農官種桑亦其所安得陌上人隔葉攀條語北園詩使君美且仁遍地種桃李豈獨放春花行看食秋子竹塢詩西坡放修竹蕭蕭復冥冥莫除塢外筍從使入園生荻浦詩離披寒露下蕭索微風觸摧折有餘清縱橫未須束蓼嶼詩風高蓮欲衰霜重蓼初發會使此池中秋芳未曾歇寒蘆港詩蘆深可藏人下有扁舟泊正似洞庭風日暮孤帆落天漢臺詩臺高天漢近正練挂林端秋深霜露重誰見落西山溪光亭詩溪亭新雨餘秋色月澗漾鳥度夕陽中魚行白石上篔簹谷詩誰言使君貧已用谷量竹盈谷萬竿何曾一竿曲

飛蓋亭在鳳縣治內方輿勝覽縣出金絲柳宋元豐間有旨取百株邵康節詩云楊柳垂金絲風動如飛蓋因取以建亭

領要亭在南鄭縣治內一統志虞允文建外覽江山內瞰

城郭取杜甫詩佳處領其要爲名又有漢節亭亦允文建
取杜詩漢節梅花外句意

古蹟

祠宇

上古黃帝廟在城固縣西南二十里

周伍子胥廟在城固縣北百丈堰明一統志元至正元年
建

漢高祖廟在南鄭縣南漢水濱太平寰宇記南鄭縣有漢
王堆西度漢水側有高阜爲高帝游憩之所故漢人于此
立祠

旱山祠在南鄭縣西南漢山水經注山下有祠列石十

二不辨其由蓋社主之流百姓四時祈禱焉

曹參廟在褒城縣山河堰宋竇充惠遠侯廟碑政和中敕賜額曰山河惠遠侯廟

唐公房祠在城固縣南水經注唐君字公房城固人也學道得仙入雲臺山合丹服之白日升天百姓爲之立廟於其處也洞天福地名山記斗山廬在城固縣公房宅也

謹案

府志云王莽居攝二年爲靈壽宮今名唐仙觀觀內有碑爲漢太守南陽郭芝所立公房李八百弟也後與八百拔宅昇天故世爲之立碑

集古錄作公昉者誤

諸葛武侯廟在沔縣東五里蜀志本傳景耀六年詔爲亮立廟於沔陽裴松之注襄陽記曰亮初亡所在求爲立廟

或以爲可聽立廟于成都後主不從步兵校尉習隆中書
郎向充等上表曰亮德範遐邇勳蓋季世興王室之不壞
實斯人是賴而烝嘗止于私門廟像闕而莫立非所以存
德念功述追在昔者也今若盡順民心則瀆而無典建之
京師又逼宗廟臣愚以爲宜因其墓立之於沔陽使所親
屬以時賜祭凡其臣故吏欲奉祠者皆限至廟斷其私祀
以崇正禮從之續文獻通考元至治元年三月追封漢諸
葛忠武侯爲威烈忠武顯靈仁濟王通志唐貞元十一年
左僕射嚴武增修元至元六年明永樂四年成化十九年
二十一年正德八年皆重修廟中有石琴一張無弦扣之

其聲清越相傳武侯手揮之器

金張夔武侯廟詩長蛇成八陣渭水鼓雷波地據三

分少公才十倍多慨吟梁甫韻帝歎大風歌日月光同烈青編永不磨謹案廟又有唐舒王謨重修祠宇碑沈迥撰

文元錫正書貞元十一年二月立

張桓侯廟在西鄉縣治西關外通志明正統四年山賊逼邑城忽大雨水湧賊不戰而懾時巡撫藍璋夢獲神助題請勅封武義忠顯助順王建廟歲以八月祀焉

女郎廟在城固縣女郎山道家雜記張魯女曾浣衣於山下有白霧蒙身遂孕恥之自裁謂婢曰死後剖我腹視之婢依其言得龍子一雙遂入漢水女嬪于山頂龍子數遊母墓前成谿徑有廟在焉

晉楊君神祠在略陽縣治東元和郡縣志在順政縣西南二里嘉陵山下卽楊難當也太平寰宇記在嘉陵江南山上府志今日武都王廟

唐延慶寺在褒城縣東十里通志俗呼打鐘寺唐貞觀中始賜是額明洪武初重修

崇慶寺在褒城縣西二十五里通志俗呼牛頭寺唐貞觀間僧法融立

寶山寺在城固縣東北十五里通志一名蕙香院唐開禧時建宋嘉定明正德間屢加修葺殿閣雄麗爲一邑之冠杜陽院在城固縣昇仙口通志創自唐朝其地左環壻水

右近伏牛岡阜盤旋林麓幽邃爲一方之勝

智果寺在洋縣西三十里通志唐儀鳳中建敕賜藏經宋元間屢修寺中舊有牡丹兩株高可丈餘

開明寺在洋縣治南一里古法輪院通志唐開元中建中植古柏八株根節偃砢刺史文通留題筆勢飛動

醴泉寺在洋縣南十六里通志唐開元中建元中統三年更名開化有浮屠

靈巖寺在略陽縣南七里通志唐開元時建舊宇尙存椽樹三株磨空直上巘際一松繆若虬龍宋哲宗御書司馬

光清忠粹德碑額亦在此宋鮮于侁遊靈巖詩序熙寧二年秋侁行部偶公暇與太守虞

曹郎李茂先晉弼僉謨殿省丞文紳儀公遊藥巖精舍舟南下數里乃並崖登山又數百步有一巖環覆可拾畝宮構其下崖壁巖呀石室乳竇怪不可名品橡殿之前有一軒瞰臨溪山俯仰可愛又東行迤邐行間見石脈出泉玉色如乳云飲之可蠲疾又數十步抵小崖崖後數丈廣二尋中有一石柱承載巖崖殆非耳目所聞見也其後有洞穴云昔人嘗誤入其中行數里見川源花木之遇或憶其家遂恍然欲行迷失處所余愛其景物之異徘徊久之因爲詩以記此山之勝事云唐戴叔倫宿靈巖寺詩馬疲盤道峻投宿入招提雨急山溪漲雲迷嶺樹低涼風來殿角赤日下天西偃腹虛簷外林空鳥自啼歐陽詹靈巖述舊詩不到靈巖又二年重來風景尚依然層巒迥出晴霄外倦鳥歸飛夕照邊坐愛雲林泉石好行尋煖谷野橋連同遊不覺天將晚暫借僧房一榻眠宋文紳儀遊靈巖詩一入靈巖寺凭欄望眼遙山深雲障日江闊夜生潮古洞遺仙蹟流泉旁石橋醉來搔首咏得句興偏饒張俞詩玉文山後靈巖寺四百年來選佛場滿地白雲關不住石泉流出落花香王龍亭詩古寺山坳遠躡攀一徑斜洞深留碧靄溪急蕩晴沙殿接岳松影堂鄰野谷家謁僧詢世事無語指燈花謹案寺內有宋敘別記李耆壽文嘉定戊寅六

月立清忠粹德額紹定三年三月田克仁摹刻

白鶴觀在城固縣西十里老君山王之儀碑記唐廣明元年建

宋二相祠在南鄭縣城內通志嘉定間丁熿帥興元建祀張浚虞允文二相魏了翁爲文記之

楊將軍祠在城固縣北十五里通志宋紹興二十九年建祀總管楊從義袁勃楊將軍神道碑從義鳳翔天興人從吳玠立功爵安康郡開國侯

靈澤廟在褒城縣南五十里玉泉北宋禮部牒縣境山道村有泉名曰玉泉北有龍祠春夏水旱禱者俱集嘉定四

年奉勅封神為孚濟侯賜廟靈澤

藥水寺在略陽縣通志宋建寺有至和三年劉異詩刻宋

異詩藥水標題不記年奇花深洞舊通仙山迴巨蔭常遮日境絕纖埃別是天碧照東西江浩渺綠迷高下竹嬋娟

凭欄周覽條然靜
金像香殘一炷煙

乾明寺在南鄭縣西三十里中梁山通志宋淳熙八年新

羅國僧來從海東居此寺宋苾芻修信乾明寺記大宋太平興國三年詔賜興元府中梁

山伽藍號乾明禪院山在禹貢梁州之中隸漢中郡距郡城一十二里高四里西望蟠冢北眺褒斜東瞰洋川南眺

巴邱谿谷窈窕林徑盤紆而上有石馬池水春冬不涸時出雲雨見怪馬焉今亡矣入夜或聞其嘶鳴其神曰靈壽

將軍紹興二十年聖朝加封休應侯廟號澤潤山半舊有館舍初不知何自興起偽蜀廣政間新羅國僧傳失其名

從海東來居之遂成伽藍其後有慧眼法乘禪印法眼諸師並稱有道伽藍於是乎益大紹興二年兵火延燒棟宇

經像無子遺僧徒皆奔逃去時則有尊宿居行來首圖興
造其次仲璋又其次勝嶢永璘靖永逮今海珍先後經營
之垂五十年伽藍皆復就凡爲屋若樓殿堂室祠廟亭宇
以至賓寮廡舍無慮千楹闢田疇水陸百頃飯禪衲歲不
下十餘萬人嗟呼盛哉恢宏象教隆振法化如此六尊宿
者可謂能事矣雖然今之成者昔之壞者也方其壞也非
夫郡邑公卿大夫士清信檀越戮力調護之曰我將告厥
成何由哉珍洋川人肄業于城固法隆院嘗遊東吳從天
臺禪師授心印臨濟正傳也住山十餘年禪林法制粲然
一新乃礱石于宇下使其徒德珪來俾予書之是歲辛丑
淳熙八年秋九月
月苾芻修信書

龍亭寺在洋縣東二十里通志宋時建在漢龍亭侯墓前
卽古龍亭縣故址也

五雲宮在洋縣東南明葉崇德五雲宮記神張姓名嘉唐
天寶間人宋嘉定時洋人立祠祀之元初封正直靈祐忠

顯通慧王至元間加封昭德

明方正學祠在南鄭縣西南通志萬歷間建謹案方孝孺嘗官漢中府

教授以遜志明其齋蜀獻王改曰正學

勝水寺在南鄭縣東南十五里通志明嘉靖間建泉從佛

坐下流出甘冽不竭故名

鎮江寺在洋縣東三十里通志漢水東流氣勢直下至此

山迴路轉天成鎖鑰明萬歷間建寺鎮之故名

普賢寺在西鄉縣北五十里通志明宣德中建其地二水

合流四山環抱得幽遠靜深之槩

鐵佛寺在寧羌州北一百三十里通志本唐宋古刹華嚴

寺舊址遺鐵像三因以爲名明萬歷間重建復鎔銅萬五
千斤鑄爲佛像城西一百里隆興王志景獻六年覆艾
中臺觀在寧羌州北一百六十里中臺山通志明萬歷間
因元帝著靈異建此觀廟宇壯麗爲一州勝槩

古蹟郊邑

唐虞媯墟在城固縣西北二十里續漢書郡國志城固縣
媯墟在西北水經注漢水又東逕媯墟或作姚墟一統志
其地有二井一苦一甘名曰雙井相傳虞舜所居

周扁鵲城在南鄭縣西南水經注當是越人舊所經涉故
邑流其名

漢韓信臺在城固縣東六里水經注大城固北臨壻水水北有韓信臺高十餘丈上容百許人相傳高祖齋七日置臺設九賓以禮拜信也太平寰宇記高祖初爲漢王欲東下拜韓信爲將因築此壇受命

督軍壇在沔縣東南其旁有八陣圖水經注定軍山東名高平是亮宿營處營東卽八陣圖也遺址略在元和郡縣志八陣圖在西縣東南十里諸葛亮壘門以石爲圖元一統志今呼其地爲督軍壇

陽安關在寧羌州西北一百里劉後主志景耀六年鄧艾鍾會等伐蜀姜維表遣張翼廖化督軍分護陽安關口一

統志關城東西徑二里南倚鷄公山北傍嘉陵江謹案陽平關在

沔縣之西與此自是兩地不得合而為一

連雲棧在褒城縣北十里褒谷口戰國策秦棧道千里通

於蜀漢史記漢王之國張良送至褒中因說漢王燒絕棧

道謹案寰宇記南鄭縣有絕棧在郡城東即此水經注褒水自大石門歷故棧

道下谷俗謂干梁無柱也諸葛武侯與兄瑾書曰前趙子

龍退軍燒壞赤崖以北閣道緣谷一百餘里其閣梁一頭

入山腹一頭立柱於水中今水大而急不得安柱也後諸

葛卒於五丈原魏延先退而燒之自後案修舊路者悉無

復水中柱經涉者浮梁振動無不搖心蕩目也輿程記陝

西棧道長四百二十里自鳳縣東北草涼驛為入棧道之

始南至褒城之開山驛路始平為出棧道之始縣志明洪

武二十五年因故址增修約為棧閣二千二百七十五間

統名曰連雲棧謹案自縣北雞頭關起一里至石洞又一

崖下步龍江最為險峻又三里至倚雲棧即響水灘前有

石佛灣盤龍塢又七里至老君崖又四里至堡子舖又四

里至飛石崖又一里至閻王碓又三里至架雲又八里至

逍遙又十七里至馬道舖又十里至順平又十里至甜竹

碓又三里至三分舖即馬道驛又五里至燕子崖巨石橫

互江水滌洄又二十里至鳴玉即簸箕棧又二里至虎頭

關又一里至上天橋又三里至武曲關又一里至火燒碓

又一里至碧霄又二里至石梯又七里至青雲即臘魚溝

又數十步至臘魚潭縣境閣道至此自臘魚潭而北又有

焦崖舖黑魚潭飛仙閣石溝橋八里關雲門新開嶺安山

灣青陽

等棧

方輿紀要自鳳縣至褒城皆大山緣坡嶺而行有

缺處以木續之成道如橋然所謂棧道也其間喬木夾道

行者遇夜或宿于巖穴間出褒城地始平唐歐陽詹棧道銘并序秦之坤

蜀之艮連高夾深九州之險也陰豁窮谷萬仞直下犇崖

峭壁千里無土互隔呀絕巉巉冥冥麋鹿無谿猿猱杵望

三代而往蹄足莫之能越秦雖有心蜀雖有情五萬年間

曼不相接且秦之與蜀也人一其性物同所宜嗜欲無餘

門教化無餘源可竄遷可親昵擘析地脈睽離物理豈造

化之意乎天實凝清而成地實凝濁而形當其凝也如鎔

金下鑄騰雲上浮空隙有所不周迴翔有所不合澄結既

定竅缺生乎其中西南有漏天天之竅缺也於斯有茲地

地之竅缺也天地也者將以上覆下幬含蓄萬靈可通必

使而通者也苟有可通而未通聖賢代其工而通之故有

為舟以濟川為梯以踰山惟茲地有川不可以舟涉有山

不可以梯及粵有智慮以全元造立巨衡而舉追氏緹纜

以下梓人猿垂絕冥鳥傍危岑鑿積石以全力梁半空于

木棚斜根玉壘旁綴青泥截斷岸以虹矯繞翠屏而龍蹠

堅勁膠固雲橫砥平總庸蜀之通途繞岐雍之康莊部邑

之能步山川之無脛若水決防如鴻嚮陽南之北之踵武

湯湯躋峨峨以自若臨蒼蒼而不具繇是贄幣以遙達人
神以會同稽禮樂之短長量威力之汚隆可王者王可公
者公而相次以風或曰受琢之石長存可構之材無窮易
剏代蠹斯道也未始有終嗚呼爲上懷來在乎德爲下昭
德在乎義德義之如今日則或人之言有孚其反之則石
雖存恐不爲琢材雖多恐不爲構想夫往昔有時而有有
時而無是用惕惕天下蚩蚩知聖賢創物之意之人寡明
德義固物之道之人稀敢陳兩端之要銘諸斯道之左庶
主德義者存今人之所履踵武湯者荷古人之攸作爲銘
曰天覆地燾本亦備設大象難全或漏或缺損多益寡聖
賢代工彼惟有缺與無缺同維北曰秦維南則蜀地缺其
間坤維不續斗起斷岸屹爲兩區秦人路絕蜀火煙孤天
實不通賢斯有造鑽堅刻勁無蹊以道若川匪舟若陸匪
車緣危轉虛步驟交如構雖在功存亦由德項怫劉怒從
完以踣隋落我營自巔而植地非革勢財不易林培植之
致惠怨之心勿謂是道不恆勿謂斯道可久禮不以禮可
有而無恭不以恭可無而有創之之意如彼固之之理若
此彼知不易茲而易知勒銘道左其同我思王維送楊長
史由棧道入川詩褒斜不容噫之子去何之鳥道一千里
猿聲十二時官橋祭酒客山水女郎祠別後同明月君應

聽子規明楊一清出連雲棧詩鷄頭關下石杈牙傍險憑
高此駐車一水縈紆通漢沔萬峯迴合控褒斜雲中板閣
燒難絕谷口篔簹翠欲遮蜀道
秦關俱莫論如今四海正爲家

漢王城在南鄭縣東十里太平寰宇記漢高帝所都

張魯城在沔縣西水經注瀘水南逕張魯城東初平中劉
焉以魯爲督戰司馬住漢中斷絕谷道周遠城治因卽嶠
嶺周迴五里東臨濬谷西北二面連峯接崖從南爲盤道
登陟二里有餘通典西縣西四十里有關城俗名張魯城
白馬塞在沔縣西北水經注瀘水又南逕張魯治東西山
上有張天師堂庾仲雍謂山爲白馬塞堂爲張魯治東對
白馬城一名陽平關其城西帶瀘水南面沔川城側二水

之交亦曰澧口城魏劉資諫用兵南鄭疏昔武皇帝征南鄭取張魯陽平之役危而後濟

西樂城在沔縣東南蜀志建興七年丞相亮徙府營于南山下原上築漢二樂城華陽國志蜀以沔爲漢城以對城固之樂城而言故亦曰西樂城水經注沔水東逕西樂城北城在山上周三十里甚險固通典故西樂城在西縣西南

黃沙屯在沔縣東北蜀志建興十年丞相亮休士勸農于黃沙水經注黃沙水側有黃沙屯諸葛亮所開也

街亭在城固縣西十五里蜀志魏將張郃與馬謖戰于街

亭謬違諸葛亮節制軍大敗太平寰宇記南鄭縣有街亭
卽蜀將馬謖與張郃戰處

美農臺在南鄭縣東太平寰宇記梁州記云後漢安帝時
太守桓宣每至農月親載耒耜以登此臺勸民故後人號
曰美農臺

釣臺在褒城縣東北五里一統志褒水出谷處巨石高廣
相傳鄭子真垂釣於此

樊噲臺在城固縣北五里水經注壻水逕樊噲臺南臺高
五六丈上容百許人輿地紀勝臺卽樊噲所築

樊河橋在褒城東北九十里通志跨馬道河上漢將樊噲

所建

郟閣在略陽縣西二十里一統志漢建寧三年建漢李翕

郟閣頌惟斯析里處漢之右溪源漂疾橫柱于道涉秋霖

澆盆溢滔涌濤波滂沛激揚絕道漢水逆瀼稽滯商旅路

當二州經用行沮沮縣士民或給州府休謁往還恆失日

晷行理咨嗟郡縣所苦斯溪既然郟閣尤甚緣崖鑿石處

隱定柱臨深長淵二百餘丈接木相連號為萬柱過者慄

慄載乘為下常事迎布歲數千兩遭遇隕納人物俱墮沈

沒洪淵酷烈為禍自古迄今莫不創楚於是太守漢陰阿

陽李君諱翕字伯都以建寧二年二月辛巳到官思惟惠

利有以綏濟聞此為難其日久矣嘉念高帝之開石門元

功不朽乃俾衡官掾下辨仇審改解危殆即便求隱析理

大橋于今乃造校致攻堅結構工巧雖昔魯斑亦莫倣象

又驛散關之蕪漂從朝陽之平燧減西濬之高閣就安寧

之石道禹導江河以靖四海經記厥緒艾康萬里臣□□

□勒石示後乃作頌曰上帝綏□降茲惠君克明俊德允

武允文躬儉尚約化流若神愛氓如子遐邇平均精通皓

穹三納符銀所歷垂勳香風有鄰仍致瑞應豐稔年登居

民安樂行人傾欣慕君靡已乃詠新詩析里之閣兮川兌
之間高山崔巍兮水流蕩蕩地既磽确兮與寇爲鄰西嶺
鼎峙兮東以析分或失緒業兮至于困貧危危累卵兮聖
朝閔憐分符坑壤兮乃命是君□□救傾兮全育子遺劬
勞日稷兮惟惠勤勤拯溺亨屯兮瘡夷始起閭閻
闔充贏兮百姓歡欣僉曰大平兮文翁獨存

陰平鎮在城固縣南十八里蜀志景耀中張翼董厥詣陽
安關口爲諸圍外助至陰平留住待之水經注白水東南
逕陰平故城南縣志今名太平村

大散關在鳳縣東北五十里與鳳翔府寶雞縣接界一統
志漢高祖從故道敗章邯於陳倉由此以出

錯喜懽鋪在大散關上蘇軾過惶恐灘詩自注錯喜懽鋪
在大散關上

張騫墓在城固縣西二十三里

李固墓在城固縣西三十里水經注長柳村名也漢太尉

李固墓碑銘尚存文字剝落不可復識矣

謹案固為梁冀所害帝哀弟子

董班之義許送至漢中而葬今林縣及磁州志俱載固墓誤也

七女冢在城固縣東北水經注壻水東逕七女冢冢夾水

羅布如七星高十餘丈周迴數畝元嘉六年大水破墳得

一磚刻云項氏伯無子七女造椁世人疑是項伯冢

謹案項伯

名纏封射陽侯子唯嗣水經所疑頗妄辨見王世貞宛委餘編

張魯女墓在城固縣黃沙水南水經注黃沙水南有女郎

山山上有女郎冢言張魯女也

蔡倫墓在洋縣東二十五里關中陵墓志在龍亭鋪南

諸葛武侯墓在沔縣南十里定軍山下蜀志亮遺命漢中

定軍山為墳冢足容棺斂以時服不須器物魏鍾會至漢

川令軍士因山不得於墓所芻牧樵採水經注亮遺命葬

因即地勢不起墳隴惟深松茂柏攢蔚川阜莫知墓塋所

在元和郡縣志貞觀十一年敕禁樵採朱子語類陸務觀

說當春月男女皆上諸葛公墓唐張演武侯墓詩勳業伊周亞經綸楚漢前有才真

命世無地與中天大統春秋意騰章說命篇吾家子房後千載仰英賢

馬超墓在沔縣東五里關中陵墓志漢建安五年諸葛武

侯軍至沔陽親詣墓所設祭今名馬場謹案四川通志新都縣南亦有馬孟

起墓未
知孰是

張疑墓在褒城縣南柏鄉街一統志世呼褒德將軍墓上
多叢木人不敢伐

晉黃金戍在洋縣東水經注漢水又東逕大小黃金南山
有黃金戍傍山依峭險折七里氏掠漢中阻此爲戍與鐵
城相對昔楊難當令薛健據黃金姜寶據鐵城卽此

梁木馬城在西鄉縣西南續通考梁大同間於巴嶺側立
東巴州治木馬縣卽此城

迴車戍在鳳縣南寰宇記梁太清五年西魏遣達奚武楊
寬率衆七萬由陳倉路取迴車戍入斜谷關出白馬道謂

此也

隋百牢關在沔縣西南隋書地理志西縣有關官在百牢山元和郡縣志隋置白馬關後以黎陽有白馬關改名百牢太平寰宇記開皇中置以蜀路險號曰百牢關一云置在百牢谷元大一統志今三泉舊縣西古關是

甘亭關在褒城縣北九十里太平寰宇記隋開皇元年築今爲甘亭戍

唐七盤關在寧羌州西南六十五里唐書廣明初行營都統王鐸置關于沮水七盤三溪木皮嶺以遮秦嶺

褒城驛在褒城縣治西今名開山驛元稹詩注元稹爲御

史奉使東川飲于褒城驛寶明府廳虞卿黃丞犯令逃去

再使東川至褒城驛黃丞餽酒積與同酌徧問褒陽山水

感今懷古作詩贈黃唐孫樵書褒城驛壁文褒城驛號天下第一及得寓目視其沼則淺混而

茅視其舟則離敗而膠庭除甚蕪堂廡甚殘烏覩其所謂

宏麗者訊于驛吏則曰忠穆公嘗牧梁州以褒城控三節

度治所龍節虎旗馳驛奔軺以去以來轂交蹄躪由是崇

侈其驛以示雄大蓋當時視他驛為壯且一歲賓至者不

下數百輩苟夕得其庇飢得其飽皆暮至朝去寧有顧惜

心耶至如棹舟則必折篙破舷碎鷁而後止漁釣則必枯

泉汨泥盡魚而後止至有飼馬於軒宿隼於堂凡所以汚

敗室廬糜毀器用官小者其下雖氣猛可制官大者其下

益暴橫難禁由是日益破碎不與曩類某曹八九輩雖以

供饋之隙一二力治之其能補數十百人殘暴乎語未既

有老叻笑于旁且曰舉今州縣皆驛也吾聞開元中天下

富蕃號為理平踵千里者不裹糧長子孫者不知兵今者

天下無金革之聲而戶口日益破疆場無侵削之虞而墾

田日益寡生民日益困財力日益竭其故何哉凡與天子

共治天下者刺史縣令而已以耳目接于民而政令速于
行也今朝廷命官既已輕任刺史縣令而又促數于更易
且刺史縣令遠者三歲一更近者一二歲再更故州縣之
政苟有不利于民可以出意革去其甚者
在刺史則曰明日我即去何用如此
在縣令亦曰明日我即去何用如此
當愁醉釀當饑飽鮮囊帛櫝金笑與秩終鳴呼州縣者真
驛耶矧更代之隙黠吏因緣恣爲奸欺以賣州縣者乎如
此而欲望生民不因財力不竭戶口不破墾田不寡難哉
余旣揖退老甞條其言書于褒城驛屋壁元稹詩昔年曾
痛飲黃令困飛觥席上當時走馬前今日迎迤邐七盤路
坡坨數丈城花疑褒女笑棧息武侯征一種埋幽石空開
千載名羊士誇池塘玩月詩夜長秋始半圓影麗銀河北
渚清光溢西山爽氣多鶴飛聞墜露漁戲見增波千里家
林望涼飈換綠羅薛能題褒城驛池詩池館通秦檻向衢
舊聞佳賞此踟躕清涼不散亭猶在事力何銷舫已無釣
客生風臨島嶼牧牛當雨食菰蒲西川吟吏徧思葺只恐
歸尋水亦枯又褒城驛有故元相公舊題詩因仰歎而作
詩鄂相頃題應好池題云萬竹與千梨我來已變當初地
前過應無繼此詩敢歎臨行殊舊境惟然後事
劣今時間吟四壁堪搔首頻見青蘋白鷺鷺

馬盤寨在褒城縣西一統志天復二年王建將王宗播攻馬盤寨卽此

壻水鎮在洋縣西北四十里通鑑廣明元年上幸興元至壻水鎮元豐九域志興道縣壻水鎮

五代馬嶺關在鳳縣西三十五里亦曰白馬寨一統志周顯德二年遣將王景等入散關攻蜀秦州蜀將李廷珪遣別將據馬嶺寨卽此又西南一百九十五里有畫眉關當秦蜀之衝爲褒斜要路

白石鎮在洋縣東北十里卽古白澗鎮通鑑周顯德二年蜀將李廷珪遣兵出斜谷白澗元豐九域志梁泉縣有白

澗鎮

宋銅場在略陽縣東元豐九域志順政縣有青陽銅場方輿勝覽青陽驛在縣東五十里

合江倉在略陽縣治東一統志宋開禧中楊巨源監合江倉卽此

青石關在南鄭縣南九十里一統志宋置明正德中設巡司于此今因之其地與西鄉縣及四川巴州南江縣相接爲通茶要路

武休關在留壩廳東五十里接褒城界元豐九域志梁泉縣有武休鎮方輿勝覽褒斜谷旁連武休關又極東爲饒

風關異時獨倚饒風以控商虢由武休以達長安故關為

蜀之咽喉向來撒離喝攻饒風以迫仙人謹案仙人關在鳳縣西南一百

二十里吳玠劉子羽以死守故不失西蜀諸關不可不嚴其

備府志今置武關驛通志自青岡坪埧過武休關山寨至

此甚險峻元將汪世顯取蜀經此明何景明武關詩北轉趨留壩西盤出武關微

茫一線路迴合萬重山天地幾龍戰風雲惟鳥還關門鎖溪水日夜送潺湲

白水路在略陽縣北通志宋至和中開宋雷簡夫新開白水路記至和二年

冬利州路轉運使主客郎中李虞卿以蜀道青泥嶺舊路高峻請開白水路自鳳州河池驛至長舉驛五十里有半

以便公私之行具上未報即預畫材費以待其可明年春迺與州巡轄馬遞舖殿直喬達領橋閣並郵兵五百餘人

因山伐木積于路處遂藉其人用訖是役又請知興州軍州事虞部員外郎劉拱總護督作一切仰給悉令為具命

簽署興州判官廳公事太子中舍李良佑權知長舉縣事
順政令商應程度遠近按事險易同督斯衆知鳳州河池
縣事殿中丞王令圖首建路議路古縣地且十五餘里部
屬陝西卽移文令圖通幹其事至秋七月始可其奏秋八
月行者已走斯路矣十二月諸功告畢作閣二千三百九
間郵亭營屋網院三百八十三間減舊路三十三里廢青
泥一驛除郵兵驛一百五六十人騎歲省驛廩鋪糧五千
石畜草一萬束故事役夫三十餘人路未成會李遷東川
路今轉運使工部郎中集賢較理田諒至審其績狀可成
故喜猶己出事益不懈於是斯役實肇於李而遂成於田
也嘉祐二年三月田以狀上且曰虞卿以至和二年仲春
興是役仲夏移去其經營建樹之狀本與令圖同臣雖承
乏在臣何力願朝廷旌虞卿令圖之勞用勸來者又拱之
督役應用良祐應之按視修創達之採造監領皆有善效
亦已陞擢至軍士什長而下並望賜與以慰遠心朝廷議
依其請初景德元年嘗通此路未幾而復廢者蓋青泥土
豪輩啣啣巧語以疑行路且驛廢則客邸酒壚爲棄物矣
浮食遊手安所仰耶小人居常嘗爭半分之利或睚眦抵
死况望要路無有在家遲行人一切之急射一日十倍之
資顧肯默默耶造作百端理固然爾向使愚者不怖其誕

說賢者不惑其風聞則斯路亦不廢也大抵蜀道之難自昔青泥嶺稱首一旦避險即安寬民省費斯利害斷然易曉烏用聽其悠悠之談耶而後之人見已成之易不念始成之難苟念其難則斯路永期不廢矣簡夫之文雖磨崖鏤石亦恐不足其請附于尚書職方之籍之圖則將久其傳也

黃牛堡在鳳縣東北一百一十里接寶雞界宋史吳玠傳紹興三年金將烏魯折合出和尚原陳北山谷路狹多石舍馬步戰大敗移砦黃牛吳璘傳紹興三十一年金合喜扼大散關遣騎攻黃牛堡璘擊敗之

置口在略陽縣西北三十里寶虹山下通志開禧二年金人由板閘谷遶出關後遂陷吳曦退屯置口

謹案置口即沮口也置與

通祖字

李師顏墓在南鄭縣西二十里府志蘇軾撰誌銘

楊從義墓在城固縣北十五里袁勃神道碑將軍介梁洋

間居焉卒葬于城固水北村

謹案碑以乾道五年三月立李昌諤正書王椿篆額

雍仲墓在洋縣東北十五里雍家溝通志仲爲太學士上書數章惇罪有旨流放興元府楊用中謂張浚曰洋縣雍仲可與爲友

明雞頭關在褒城縣北八里通志關口有大石狀如雞頭因名自此入連雲棧府志禎正七年漢中斷棧道守雞頭關流賊不得前縣志在七盤山下

團樂關在西鄉縣東南一百五十里通志正德間副憲來

天球駐兵于此平荆襄賊

關中勝蹟圖志卷二十二終